



處州府志

ル 5  
1573  
19



門名 5  
號 1573  
卷 19



處州府志卷之二十

處州府知府元和潘紹詒重修

人物志中

孝友

篤行

孝友

祇父恭兄人道之常曷異乎爾必至性過人奇行表著斯足多耳若聲稱藉甚而家庭之際有難言者則宗族稱孝鄉黨稱弟者尙已

宋

高停肱麗水人七歲喪父廬墓悲思至和中郡上其事得旌表後名其子曰孝臣

陳茂元麗水人居母喪水漿不入口者四日既葬廬墓

太守崔愈改其居爲孝行鄉治平元年勅賜粟帛

楊富老麗水人七歲喪父廬墓三年烏鵲來巢木生連

理紹聖中太守葉顥奏於朝詔賜粟帛錄付史館

周奇麗水人九歲喪母臥墳側二年有赤雀十數巢其

旁崇寧中詔賜粟帛

趙文澤麗水人六歲喪父廬墓有羣鼠銜花白鶴來巢  
之異大觀初賜帛五十疋

周智字惠卿麗水人六歲喪父廬墓有紫芝一莖七葉

之瑞成均試士以商山節婦麗水孝童爲問徽宗命

編入時政記高宗朝賜孝童出身終嚴州建德丞

李洞字虛中麗水人政和八年進士睦寇洪載陷郡父

歿於寇洞隨官軍收復報父仇官至秦州通判

王源麗水人父大方紹興中終江西安撫司任源九歲

扶櫬歸廬墓哀毀郡守謝伋上聞賜粟帛宣付史館

葉應光麗水人咸淳中母王氏病革應光夜夢燃香禱

天俄有鳩飛墮應光取烹和粥以進母病卽愈

詹迥字明遠縉雲人性至孝幼廬墓有露降於家官至

禮部尙書觀文殿大學士少保齊國公致仕

詹適字德遠縉雲人文章政事俱優嘗廬墓有靈芝之

瑞爲御史臺主簿以直名累官銀青光祿大夫龍圖閣學士

葉洵仁字中行松陽人宣和中盜起奉親逃匿遇賊以身翼父被重創不少卻賊曰孝子也引去家貧母意不願其進取遂躬耕以娛親心後孫重開成進士

徐鏗字敬亮松陽人通六藝以孝義廉節名冬月嘗涉深山大雪中求窩暖之地以葬親親在閉門謝客周旋左右親沒始遠遊嘗入僧房見寶藏不顧卒時官題其墓曰清儒事聞以大夫禮旌之樹坊曰儒行

蕭必強字功甫松陽人登進士親疾祈以身代及居喪

慟絕而蘇里人呼爲蕭孝子舅氏無子歸田五十畝屬以後事及歿厚治喪葬立劉氏後還其田

薛溶字平甫松陽人繼母項氏性酷溶曲爲承順奉養備至歲時爲壽率子弟雜拜項感悟愛溶若己出及項歿喪祭盡禮哭奠終身

鄭千義遂昌人母病刲股救療未效或曰人肝可救遂刲其肝以進母等愈郡守趙崇絢改其鄉曰孝行鄉周孝聞龍泉人七歲居母喪廬墓政和十年以孝行薦命以官不受邑人卽其所居題曰孝子以旌之

盧猛龍泉人幼盡孝道行跡甚著郡守監司上其事號

其所居里曰孝義山

元

葉峴字見山青田人母嘗病心痛扶持不離側母憐之令外息峴夜潛入捫心達旦母終舉進士年六十三  
歷官南安尹著見山集

詹國芳松陽人元季兵亂親不獲葬寇至國芳抱棺號泣寇曰孝子也去之既葬廬墓哀戚積雨崩廬不傷其體

明

祝崑麗水人幼侍母陳氏避亂山中賊至母投崖下崑

繼之時雷雨大震賊眾驚潰母悶絕崖下崑掛於樹梢俱救治得全洪武七年舉孝廉擢潛山知縣

葉琮麗水人幼失怙恃事叔嬸如父母叔亡嬸陳氏性偏常佯狂逐之琮讓田宅居外旦暮歸省如此者十餘年陳歿其子珣以前田宅還琮自葬其母

趙初麗水人家貧力學父卒苦無地葬其友吳伯昭割地歸之躬負土營穴成疾卒

葉鉅字伯廣麗水人正統間歲饑鉅出粟四千斛以振又山寇猖獗鉅畫策靖之以功授巡簡陳情乞移贈故父孟昭詔允之表其門曰忠孝所著有樂邱集

魏忠字尙敬處州衛人年十五入郡庠二十登鄉薦事親以孝母病藥必先嘗以進及終喪祭盡禮發明忠孝二經字說又制喪禮一書

高文景字仲暘處州衛人母病刲股以進既喪停柩寢室夜半聞母大呼好看我須臾鄰家火起景撫柩慟哭火至舍傍而止又葺廬守墓虎夜銜豕遺之後以貢任廬州訓導陞潼關教授

王葑字德敷麗水人嘉靖己未進士觀政刑部接丁父母憂廬墓五年有馴鹿之瑞哀毀遺疾終湯臨川哀詞云謂天道有知王孝子無祿謂天道無知王孝子

有鹿後祠鄉賢子良詩良聘均諸生有文名

單槐處州衛人母年七十依子舍不忍遠離母病侍湯藥忘寢右目失明渡溪延醫墮水中漁人救之得不死子熙載以恩貢授陳州同知熙志鴻達俱諸生

鮑知仲字締叔麗水人幼侍父楫入京聽選舟渡黃河父溺仲躍身負拯踰水數里父子俱濟母疾刲股以療子坤順副榜刲股救親孝亦如父

王孕昌字長文麗水人一中子幼以孝聞由恩貢授推官奉母純孝與弟友恭工詩精翰墨

劉延孕字永光麗水人

麗志作劉延胤

郡庠生治喪遵文公家

禮不事浮屠親族無力婚葬者助之年七十九卒

陳昌蔭字五昌麗水人崇貞間歲貢方田兵潰蹂躪枯

郡同妻奚氏奉父母避難風山遇賊妻投崖死父傷

左足負以逃父歿撫兩弟均產以給之

王孕昇字仲方麗水人一中子博極羣書天性至孝萬

厯間大水母潘淑人病瘧負從深水中出甫離屋牆

壁俱傾母驚瘧亦旋愈與伯兄孕昌肩隨怡怡兩中

副車考授通判壽八十四

章射斗字文登麗水人弱冠入郡庠事父母孝敬父歿

撫庶弟友爰有薛包風卒年七十九

蔡子宜青田人丙戌進士母老乞終養飲食服御不敢

與親並居鄉無少長必接以恭及親卒遂不復仕以

經術教授鄉里著有披雲集

蔣鵠字孔志青田人幼喪母年十六隨父宦京師父卒

扶柩歸葬廬墓一年數有虎咆哮後馴擾墓木產白

鳩飛鳴上下

厲孝先青田人少貧父被繫京師身往代之尋白其事

父旋卒孝先竭力營喪欲還柩人以路遠難之孝先

悲泣欲自鬻鄉人仕於朝者聞而賻焉遂得歸葬

毛生青田人清慎好禮家貧以孝聞壽至九十

周永安青田人母喪未葬火起鄰家永安他無所顧惟扶柩以避疾革命其子召負者焚其券而卒

張銓青田人父病癰銓以口吮之強年妻死不復娶由責任訓導

鄭濂縉雲人代父往戍遼陽以不及事父思泣不置同行者呼為望雲生父亡哀慟成疾卒

馬璉字宏器縉雲人父病瘵璉焚香於臂顙天祈代父歿負土築墳廬墓側人呼其墓曰孝子墓

樓景明縉雲人父疾刲股和羹以進及卒停柩中堂鄰右火起號天大慟火隨息後舉孝廉知魏縣政尚寬

厚縣有蝗景明齋戒祈於城隍蝗不為害

李檣字宗矩縉雲人早喪母與妻陶氏事父并繼母楊氏曲盡其道楊屢以非理責之畧無怨懟楊嘗責陶

至鼻折血流被面次日省問如常楊亦感悔  
扶九萬縉雲人父喪廬墓有馴虎之異以春秋教授鄉

里洪武間舉孝廉不赴

周豪縉雲人父病醫勿效每夜焚香拜斗忽一夜夢中若有告者曰園有肉可療病起索得一烏為羹以進

父疾瘥發為疥豪日夜抑搔之後疾復作祈禱如初疾又愈及終無葬具傭身以葬廬墓而卒從子紋事



父亦盡孝遇疾籲天願代果先父亡父壽至期頤

李僊縉雲人父棠巡撫廣西僊奉母還及應貢母遣赴部冢宰王公勦欲授京職以母老辭曰願歸養不願仕也與金華教授又辭王曰有此父乃有此子從其志居喪足不履私闕叔榮劇疾僊就其室飲食之三年繼祖母楊氏患痰僊手承之時稱孝子順孫

樊迪縉雲人事親溫清悉遵古禮雖薄味必手製以進母年九十終寢苦三年事父益謹父百有三歲每延賓客爲撰杖屨皤然侍側父歿哀毀如喪母

呂琅縉雲人好讀書任建平丞有德政歸年六十六值

父喪時方沍寒水漿不入口赤足履地竟以毀卒

李正蒙字汝明縉雲人萬曆庚辰進士禮部儀制司主事以學行掄教駙馬考滿當遷父老乞終養大宗伯沈公鯉留俟數日請命轉本司員外郎毅然曰吾何以美官易愛日之情哉遂飄然而歸著有白華樓集周懷慄字汝敬縉雲人博通古今事寡母曲盡孝道家貧仰事資從修脯入縉中譽髦大半出門下

樊一鵠字子正縉雲人從父宦遊及病回籍侍奉醴粥藥物勞瘁備至年二十七妻亡不再娶父歿葬祭盡

禮

盧鶴鳴字仲鶴縉雲人七歲父病立牀下達旦不寐日出則拜願減年以益父壽父卒哀毀如成人事繼母曲盡子道事伯兄克讓遺金屢困棘園資志歿京兆程公正誼稱其文章通秦漢以上孝友居曾閔之間盧廷瑾字叔瑜縉雲人讀書知大義父病視藥物無間及病危入密室割左股肉暈絕人救之乃甦以肉治饘粥進一七父覺氣和再進甘之病漸愈知縣馬公良以孝踰今古表之

李金字懷泉縉雲人孝友敦睦父璽知趙州寢疾祝天請代病卽瘳明年父疾篤哀毀幾絕州人訂蓼莪編

以贈由廩例授福甯州判自言宦不論尊卑若漁一錢枉一事便獲罪聖賢辱祖父陞福建理問以母老致仕壽八旬有四

鄭期進字孔先縉雲人淹貫經史從遊弟子甚眾父感瘋疾朝夕侍藥衣不解帶者年餘及卒廬墓側三年與兄期達友愛五十載未嘗失容督學許公豸於課士日詢定德行通庠合舉者六百餘人

樊潔字叔廉縉雲人年二十二時以父歿太學至丹陽哀慟得狂疾丹陽令何公鏜救之贈以孝廉二字歸建思永亭悲吟其中

杜珽字公遂縉雲人事母至孝母疾百治不瘥呼天請代乃刲股以進母果愈

葉繼華松陽人年十六父簽解白糧洪武初軍興糧急違限輒死四子皆哭別華獨坐歎諸兄讓之乃曰兄輩孝思泣數行耳吾欲代父死奚哭爲父駭阻謂不更事華不聽比至果愆期將就市適同事有母子爭死慟哭聲震天司刑哀之爲抗疏上曰違期小失也焉可以是遽殺人因得俱釋家人世守其教不涉訟周玘松陽人性慈孝後母譖父逐之玘愈恭謹侍母疾晝夜焚香祈禱忽牀壁間見火光如手狀母病遂瘳

劉順字子讌松陽人母病罄家資以請醫母將危刲股進療升屋告天乞代從屋投地死而復蘇迄母病瘳絕葷酒以祝母壽邑尹魏永洲表其門曰孝子劉順周輅字宗商松陽人家貧贅外家母歿父欲以火瘞輅方十歲號哭止之登宏治乙卯鄉薦授安東知縣時歲旱蝗輅積誠祈禱蝗不爲災徐鼎臣字忠儒松陽人總角時母有危疾刲股幾絕若有神掖之乃甦母卒號慟廢寢食伯叔父強之進糜粥服闋補弟子員以扶父櫬京邸勞瘁而卒邑人憐其死孝目其葬地爲徐孝子墓

徐新化字心純松陽人父學韶孝友好施新化克承父訓爲時名士與婦毛氏奉甘旨無間韶疾劇新化奔走醫藥氏刲股顛天學使者錫以純孝格天額

詹瑗松陽人父嘉言官於蜀瑗隨待遇流寇至父令全印慟哭不忍別父曰汝能全印方承我志不得已同吏齋印以遁寇稍退營收父屍扶櫬而歸

周思立遂昌人洪武末父閏宗畏爲掾自斷指時法當充軍事覺逃匿官執思立詣獄一日大雪八尺許思立被拷掠置雪中幾死會赦免乃求得父父泣思立已喪明思立舐之目復明

黃鐸字仲信遂昌人曾祖道俊丞襄陽時以誣誤下大理理祖原照擊登聞鼓捶死鼓下鐸痛祖死非命乃建望雲庵塑像於中終身哭泣嘗自題像讚有學聖賢學學不能成道聖賢道道不能行儒衣儒履空負虛名惟孝惟友無辱無榮之語故以孝友名其堂

朱澗字德淵遂昌人性謹厚贊父盼修築橋梁道路費以萬計父歿執喪如禮奉遺命重築王村石橋成父志鄉里稱爲朱孝子

葉弘淵遂昌人事父至孝父年六十妾生一子棄之淵竊取乳育成人及分產則曰俱父遺體何肥瘠爲與

之均析長兄早逝撫孤姪如己子焉

吳一鵬遂昌人年十七同巷失火鵬在外念母奔回家已在烈焰中狂號突火人以殺身無益挽之鵬曰母死何以生爲挺身入母子俱斃當道建坊旌之

徐瀟字士澄遂昌人親病晨昏侍左右衣不解帶者經年居喪哀毀廬墓當道旌其門曰孝友

顧仕成龍泉人事繼母孝謹母病疽吮血而愈及歿哀毀旣葬廬墓有白兔紫芝之祥景泰間旌其門

張調鼎龍泉人母病醫禱盡力旣葬廬墓三年妻死鰥居終身隆慶間知縣李祝獎其門

楊泮字肇卿慶元庠生幼喪父母病刲股療之及歿慟哭數日不食厝二親墳石皆躬負廬墓三年母素畏雷每逢風雨往墳哀哭

吳相字汝弼慶元人節母邱氏遺腹生甫長克盡子道母故相年七十躬詣司府陳其事詔表其門

葉儼字若思慶元人親歿遭火眾競取財物儼獨跪柩前哀號遇人泣曰財物任取幸存親柩眾憫而出之鄭璿宣平人天順間父孟溫爲糧長輸運温州遭颶風覆舟救而獲免遂得危疾還家歲餘百藥不效璿憂甚每夜籲天祈以身代旋刲股爲粥以進父疾尋愈

吳翔字存翔景甯人母陳氏邁疾踰年不瘳翺忽晨起以家事屬諸弟貿貿而出眾莫測至暮歸喘息偃卧出肝肉寸許付諸弟眾詰之乃曰吾走禱神祠剖胸取肝遂昏暈比覺日已夕矣遂剉肝肉糜中母食之疾頓愈至八月疾復作而歿

梁祚景甯人居溪濱母終未葬洪水暴至眾競挈資避祚獨念母櫬未舉號泣徒跣扳而扶之水深不可立幾沉沒者數次祚盡力以必濟爲期既水勢盤旋若有推而助之者漸入堂輿得一梯爲固乃號曰吾在此母櫬可無慮矣既而檢其家所漂失者亦鮮

潘沆景甯人詩文過目成誦事母甚孝冬必以身溫被母卒跣足營葬結巢於樹守之子琴進士

國朝

許王聘字簡茲麗水人郡庠生母病刲股以療訓幼弟成立女兄弟三厚奩具以慰母心子超越皆有文名湯天祥麗水庠生父病癰祥爲吮毒半載獲愈母復感盡疾祥持齋三年母亦享壽當道旌曰篤孝爭聞王繼祖字爾志麗水人一中孫少聰穎通經史居父喪水漿不入口與諸弟分產獨取礮瘠康熙甲寅閩逆倡亂與長子運乾俱陷賊不屈賊釋之辛酉以禮經

魁浙闈丙寅洪水煮粥活餓者濬通濟渠以興水利  
太守劉公聘修郡志後考授內閣中書有文稿行世  
梁天成字蒼培麗水歲貢家貧兄弟三人皆不給母王  
氏雙瞽成獨膳之已雖飢母必甘旨也邑令廉其孝  
友延爲義塾師故時不能具喪門人歛金葬之

詹爾殿字書升麗水庠生甲寅閩寇執其父哀叩之盛  
暑跪烈日中兩日不進湯水賊感而釋焉

王學祖字而敏麗水庠生孕昌子幼孤苦志力學甲寅  
避耿亂猝遇賊負母而逃母得疾刲股療之與兄宏  
祖極友愛兄艱於嗣賣己婢爲兄納妾

朱珍字聘公麗水人鄰火及其廬珍自外至犯烟燄掖  
祖父出有侵其地者恐傷父意置弗問家貧投徒數  
里外朝夕定省三十餘年如一日

褚懋官字日宜麗水庠生甲寅閩變負母陳氏入山飢  
餓數日其妻馮以乳膳姑得免死丙寅春鄰火延燒  
負母從火中逃出閏四月洪水舉家遭沒獲救惟陳  
氏溺亡懋官尋覓三日焚祝矢誓不獲親尸終身不  
食卒獲而葬之

徐震字啟亨麗水庠生父夜被賊執震當出痘越水呼  
救母病割股救愈教子長雲長登長鼎皆諸生

陳大鶴字鳴九麗水庠生孝事繼母愛撫幼弟精岐黃術未嘗計利學政王以孝友端方旌之

吳壤麗水人六歲時以母病誓斷葷血父病刲股以療年十三卒

王尙廉字子貞麗水人幼孤而孝晝夜挾冊依其母暇則代母親庖爨澣濯以奉祖母少長爲諸生家貧介然自守郡守涂以軈甚重之語人曰王生文美矣然秋肅之氣愈於春溫恐不利名場耳會大疫祖母母相繼歿尙廉侍病積勞以哀毀嘔血卒

朱上杞字樵雨麗水人年十三爲諸生刻意勵行父歿

廬墓晨夕上食如生時先是校中諸老儒學爲詞章守師說爲科律上杞輒非笑之至是亦非上杞作僞沽名無何以孺子泣病瘖乃嘆爲至性過人也

薛士梁字梓材麗水歲貢家僅中人產與弟異居弟耗其財以卒妻湯氏年少誓不嫁士梁盡推己田與之湯全節以終

陳的喜麗水人父癰發於莖溺不通張且死的喜口吮之父尋愈

許可字與之麗水諸生父病癰閉可吮之月餘卒不起初醫者謂父衰宜用人蓐從之益劇至是知爲傷暑



大悔恨曰爲人子者信不可不知醫也聚方書晝夜讀之通其術有求診者應手效未嘗責酬母年垂八十兩足病瘡可親煇湯請洗日再四竟獲痊

陳登朝麗水人父歿廬於墓以孝稱知縣張銑詳請建

孝子坊

張芳年字子來麗水諸生幼孤母鍾愛之一日鄰人戒於火芳年甫六齡號泣牽母出俄比舍延燒芳年屋獨無恙讀書敏悟出筆卽有理致長更博學工詩尤精駢體道光癸卯省試甫畢心動卽襍被馳歸而母以前三日病亡號咷擗踊痛不欲生遂絕意進取

卒年六十五著有富山堂詩鈔

呂嘉恩麗水人父疾醫者束手恩割乳旁肉作羹以進父奪愈恩秘不言後易衣妻問血跡始知之

陳三餘麗水人誠樸有至性母歿結廬墓側晨夕不離家人餉之必祭而後食時寇亂村鄰播遷餘獨守墓舍賊過感其孝饋以盤飧弗受服闋以足疾卒知縣吳爾慶旌其門

葉鳳儀字世貞青田例貢生事親篤謹其父落拓自豪家漸落儀權滯鬻之宜歲稔積穀數千石明年大饑出之得息倍家復起年五十餘父一日失足傷其面

儀省問曰翁老矣今若是是有子如無子也兩淚交頤家人皆感泣後數年父歿猶哀哀爲孺子泣

夏呈圖字履謙青田拔貢 朝考二等以教諭用借補

桐鄉訓導丁母憂歸服闋署烏程教諭爲人雅飭無疾言厲色事父母終日侍立不懈兄弟皆業農待之曲盡恩禮

陳宗器字薦馨青田人七歲喪父母林氏撫之紡績課讀長入泮絕意進取以養母爲事母每食手脫魚骨以進將眠則短睡以溫之性剛介遇不平義形於色一見母則下氣柔聲與弟宗儒友愛撫其子如己子

邑令張君士超爲作陳孝子傳

韓照章字星緯青田人幼聰慧甫冠餽於庠吳少宗伯鍾駿稱其文似管韞山性篤孝年二十喪父哀毀骨立事母定省無間及病侍湯藥不離側母素嚴有小過輒怒章跪受責命之起然後起卒年三十六

張其翼字必飛青田人逾冠始讀書尋補弟子員性孝友父病籲天請代火焚其廬時母方臥病眾爭顧財帛其翼獨冒火出其母及析產與兄弟讓多分少

潘湘彩青田人性遲鈍讀書甚勤年三十始補弟子員母多病侍湯藥數十年始終不懈

張朝瑞青田人事親至孝父歿廬墓諱日必焚香泣拜  
卒年六十八

胡允恭字慎齋青田人明經文光子以童試冠軍爲諸  
生試輒高等丁父憂未得食餼家貧母許以爲憂恭  
思慰母志帶經而鋤溽暑行田中感疾卒年二十八  
李華縉雲庠生嘗遇寇伏草中其父負大母逃寇躡之  
將殺母父請代華見之躍出求代寇並釋焉

朱家駒字龍媒縉雲貢生幼失恃事父惟謹不命之寢  
不敢寢父歿哀毀邑令胡琇額其門曰文行足法任  
仙居學訓卒年七十一子珩字子瑄任江山學訓

鄭又新字台臣縉雲歲貢生家貧力學父歿哀毀盡禮  
事老母以孝聞撫孤姪如己子督學張以孝行獎之  
李祺字霑霖縉雲人家貧傭工以供菽水父病廢臥床  
性躁急祺侍奉益謹鄉人憫其貧每攜酒食助之父  
歿竭力營葬哀毀骨立旋以讀書食餼上庠

丁伯舟字濟川縉雲庠生母王氏病篤割股以療疾彘  
愈及卒哀毀骨立乾隆三十八年知縣曹德華旌之  
虞浙字起錢縉雲歲貢事寡母甚謹每夜率昆季侍母  
側道古今可驚可喜事析箸後視昆季家事如一或  
遠出歸夜雖闌必問母起居而後寢鄰有無禮於其

親者將往愬其子跪謝曰兒改矣毋令虞先生知也  
麻振川字秀卓縉雲監生幼失怙母嘗病劇稽顙北長  
祈以身代越數日遂瘳母嗜生魚炙時隆冬川將剖  
冰求之忽有雙鯉躍出持之歸及母卒哭幾喪明

應廷琳字獻琛縉雲人郡庠生博學善書父患痺臥牀  
十餘載奉侍無少懈及歿哀毀盡禮事繼母敬謹撫  
弱弟克篤友于教授張以士林模範匾之

呂載奇字周偉縉雲人九歲喪父水漿不入口母曰汝  
若此吾心益悲因強進飲食事母善體心志母病往  
禱栢蒼山神失足墮深澗幾死已而母瘳奇竟不起

曰今母愈吾死無憾矣道光二十二年旌表孝子  
徐開基縉雲人幼失恃善事繼母晨夕承歡數十年如  
一日年五十九夜半家人不戒於火基以母在牀人  
室負之火已及門與母俱焚

丁世勲字靜齋縉雲庠生事親善於承歡父學修邑廩  
生病篤時勲割股和藥以進創甚鉅暈而復甦父卒  
不起備極哀傷知縣湯成烈以竭力事親額之

朱純字毓庠縉雲廩貢母病與弟毓序晝夜服侍不出  
寢門者數月及卒哭踊之聲聞於閭里迨移柩外廬  
矮屋數椽純寢柩側時炎夏蚊多不懸帳序亦如之

廬州府志 卷之二十一  
生平持已方正手不釋卷子澤厚澤咸均有聲譽序  
廬廷門字枚柏縉雲人少孤而貧事母孝以廉節恪守  
母命推爲長者

潘耀祖字成元縉雲人父卒廬墓未期年母病割股療  
治數年乃卒祖廬墓者三年

陳夏林縉雲人家貧業農父早喪母施氏瞽侍奉無倦  
常爲母捕蝨輒棄不殺母卒將殮禱城隍神乞以已  
算延母壽果復蘇越十年而卒林廬墓側遇事出夜  
必還墓寢家奉粟主雖傭工亦攜飯以供母

施克懷縉雲人性純孝執親之喪三年如一雖暫出一

日必焚香以告無異生時

徐步洲字蓬仙縉雲人郡庠生事親以孝遭母喪哀毀  
成病時避寇亂居奠虞偕妻麻氏力疾回家親友多  
阻之洲曰苟得盡禮死無憾詰且賊至夫婦同遇害  
盧鋼字叔煨縉雲人家貧每食讓飽於兄忍飢苦讀以  
副貢授浦江諭得祿悉奉父兄攜弟之任課督綦嚴  
弟病親理湯藥弟卒鋼亦病不起年三十一

劉符陞字季肅松陽歲貢少失怙賴異母兄士望撫養  
成立兄弟極友愛符陞病士望親調湯藥月餘不解  
衣寢康熙十三年耿逆黨陷松邑執士望去符陞尾

賊後於中途貨執者脫士望歸以身就縛至寨拷掠無完膚大兵至乃得釋士望字公榆亦歲貢生

劉建英字鼎侯松陽恩貢父病剖左股以療後再剖右股母病亦然親歿與弟迪英廬墓側兄弟均有文名潘尙節字堯章松陽人孝事繼母父歿三弟俱幼竭力治家爲三弟延師教學均游邑庠分產取瘠讓肥雖異爨撫愛如初邑令陳公旌曰孝友良模

吳萬選松陽人年十三失怙哀毀成禮事母潘氏先意承志母卒號慟欲絕營葬市北赤溪朝夕省視者期年服闋補博士弟子員樂濟人急康熙戊戌歲大饑捐米數百石煮粥賑之壬寅又饑選捐賑如初

洪士陞字爾登松陽人性和易鄉里貧乏者周之尤敦孝道母方氏早故父續娶汪氏陞與妻朱自食粗糲而養親必謀旨甘父病侍湯藥衣不解帶者數月既卒擗踊嘔血絕而復蘇居繼母喪亦然葬之日有丹鶴一雙飛鳴墓上移時始去乾隆元年建坊

潘繼濤字宗海松陽庠生年十七居父喪哀毀盡禮事母劉氏備極色養撫季弟成立學憲顧公厚相期許招濤隨任讀書以便指授以母老弟幼辭

王謨松陽人母葉氏病篤祈以身代並剖股和藥以進

母故哀號孺慕成疾而終

孟淑思字子孺松陽庠生天性篤孝父病寢不解衣尤慷慨好施有麥舟之風幼習壁經晚益洞澈於傳註之外細加箋釋壽八十有三卒

劉元瑞字應麟松陽人明本邑知縣宛懷公之裔事二親最孝母王氏疾篤醫治不效瑞禱於神病頗愈及後居喪擗踊嘔血氣絕復甦者三年七十二而卒許元麒字光振松陽人雅篤兄弟之誼兄歿姪孤且貧麒爲喪葬挈姪於家撫育婚娶鄰里有貧乏者輒周卹之乾隆四年邑令吳薦飲賓筵以病不果

周之駒遂昌人年十歲父母俱喪依兄嫂撫育嗣兄嫂物故駒年十三順治己丑遭亂後貧不能具棺乃爲人傭牧積所得值爲兄嫂殯葬及壯辛苦持家後稍溫飽捐已產爲兄立嗣卒年七十四

華啟炯遂昌庠生幼喪母侍繼母備極孝敬撫從子如已出家不饒裕而時欲周急扶危卒年七十八

吳德謙字亨吉遂昌庠生父病割股救愈丙寅洪水漂母柩哀等七日夜得之教庶弟三人皆有聲庠序華文溥字棕一遂昌人年十四遊庠食餼試輒冠軍親老家貧以館脩養志并爲諸弟婚娶父病篤每夜露

廣州府志 卷之二十一  
三  
禱竟以獲痊年二十八齋志而歿

徐冀字北也號介石遂昌人年十八生子來章十九妻歿遂不復娶躬執爨以養親推產讓其兄親歿負土營葬年八十一歲卒

徐起澤字德溥遂昌人母疾刲股以療不起號慟哀毀適邑繆令過其門歎爲孝子遣使贈賻不受康熙壬辰洪水漂母棺起澤抱棺水中三日夜足爲之爛事父備極孝敬後立孝子祠

王紹華字景元遂昌人弟紹萃紹莘俱庶出奉父啟泰命善爲教養族有圖虎噬者造謗言訟之官紹華力

辨邑令繆偉之華友于之愛根於天性至是益著

華啟童字恂然遂昌人本童姓自幼乳於華少績學人皆奉爲師範性最孝色養備至尤篤於本生父母以選拔終年三十五妻黃氏亦守志撫孤歷三十年卒朱家選字元凱遂昌庠生閩寇包鳳起入遂逼助餉選匿其兄弟獨往包怒將斬之色不變包義而釋焉寇退大旱選質田園遠販以賑後白寇據遂有本城祝氏從總兵馬公入勦意在復仇而馬勿禁選晉謁力諫乃免改歸里收暴骨而撫其孤壽八十八祀於鄉徐來章字豐五遂昌歲貢父染瘵疾每夜露禱卒無恙



年五旬念母終日哀慕悲泣目盡腫敦崇正學一邑譽髦多出其門所著有東溪詩草不息樓課藝

俞長發字其祥遂昌庠生體弱不勝衣痛父母早逝撫

庶弟有恩弟疾日夜守視親治湯藥終年三十四

王曰瑚字夏鼎遂昌人年十三游庠家貧甘旨無缺母

病刲股以療親怒則長跪膝下解而後起弟聰幼患

瘋疾轉側需人瑚務得其歡悅以慰親心年四十三

終其父曰兒死吾何以生為慟哭七日亦逝

吳明珍字彥挺遂昌庠生後於叔繼父母早歿能得祖

母歡年十八始就學卒為知名士以祖母命貿易四

方途次遭風舟覆者數四又嘗入山為虎所攫弟明

龍舉巨石投虎虎逸去雪溪閔峙庭中丞為之傳

鄭士敬字翊文遂昌人家素封父不治生計歲年十五

理家政讀書游庠父性任俠好面斥人非羣小伺釁

搆大獄岌出萬死計脫父難善事母與庶母庶弟析

產弟耗盡岌陰濟其急親朋缺需亦解囊助之

童汝梅字鼎和遂昌廩生父母疾忘餐廢寢弟有疾一

如己疾有炙艾分痛之愛子以誠以誠俱廩生

戴中孚字衷一遂昌庠生性孝友嘗臘月隣人不戒於

火兄弟屋皆延燒孚倉舍獨無恙遂出穀與諸昆季

并賑族隣以度殘臘省垣舊乏公寓因倡捐命子得  
鳳售江干周姓屋爲栢昌公所

鄭醒世字超倫遂昌諸生事親甚得歡心叔父亦鍾愛  
之叔無子而豐於財常告親族以醒世爲嗣時仲氏  
家中落及叔卒讓於仲叔母不欲世涕泣勸之卒以  
仲氏後叔居恆恪守古訓諄諄以刻薄寡恩爲戒  
吳經字理緒遂昌庠生少失怙事寡母孝服勤左右數  
十年如一日母歿哀毀骨立兄早歿撫姪成人  
吳秉中字允傳遂昌庠生侍父疾致廢寢食居喪哀毀  
弟病親調湯藥及歿慟哭幾絕教育兩姪成名

劉振字巨成遂昌人由庠生納貲授按照磨職天性純  
孝孺慕終身撫孤姪如子訓育成人六子俱列膠庠  
吳秉權字景周遂昌廩貢未週而孤孝事寡母敬兄如  
父奉兄命肄業敷文兄歿哀痛絕食者數日遂絕意  
功名家居奉母撫姪如子及卒遺命與兄合墓  
葉蒸字秉恆遂昌庠生納貲授布理問職生母早故事  
繼母孝及卒哀痛逾於所生分析田宅請兄恣所取  
兄不可讓之愈力濟諸姪未嘗有吝色

朱英字邦彥遂昌庠生納貲授按照磨職父卒英甫七  
齡哀毀如成人稍長事母益謹母病劇願減算以增

母壽兄弟俱早卒竭力以撫孤姪

華濤字雪帆遂昌監生事父勤謹父病篤額天求代凡有義舉慷慨倡先嘉慶元年薦舉孝廉方正不赴

程宗伊字景川遂昌庠生性孝友粵匪擾境挈眷逃避寇近扶母走被虜母子猶扯襟抱泣母亦尋斃

吳守基字蔚村遂昌人由恩貢授直隸州州判職髫齡失怙事孀母盡孝寢饋必親友愛兩兄精書畫行草尤爲人所珍朱勿軒明府聘修邑乘

潘應禮字敦厚龍泉人兄應祥早逝嫂再醮去應禮撫孤姪元能及長遭耿亂被執應禮泣以身代賊義之

俱釋回

徐子壽龍泉人週歲喪父母適江西旅人攜歸南康之都昌壽長思尋母積傭值十餘金裹糧之江西抵都昌求之不得繭足徧訪經小南門外見破茅一椽內有貧嫗三人壽察語音異之就訪則其母在焉相持大慟二嫗亦爲涕下乃迎母歸傭力以供菽水母歿負土營葬邑人爲詩歌紀其事

范炳華字春林龍泉人生有至性邑令鍾祥以名進士宰龍泉一見目爲純儒家無厚產事父母所需必給居喪哀毀骨立孝感里鄰弟英華早逝經營殯殮以

所存薄產概歸弟婦撫其遺孤由拔貢中道光壬辰  
恩科舉人癸巳禮闈報罷歸途有鬻子者罄貲爲贖還  
年四十六卒著有敬業軒文稿四卷古今體詩二卷  
摘藻集八卷同治八年祀鄉賢

瞿自知龍泉歲貢篤於友愛兄自明有疾親侍湯藥朝  
夕不離授徒必與言經明行修律已則以陰隲文功  
過格爲圭臬建文昌閣三楹意在奉行也

連應瑞龍泉人母病嘗刲股以奉平生勤儉持家而於  
貧恤苦則饒有古風

王庭芝字鳳來龍泉人母病刲股以進病旋愈

瞿自正字嘉麟龍泉人居城西分產後徙居查坦奉母

至孝母好食鮮魚每日來城購歸至老不衰

林彥陞字于蕃龍泉人郡庠生事母日奉甘旨恐家人  
爲之不潔必躬親烹調敬以進之母怒輒跪怒解始  
起爲親戚稱貸嘗以己產代償年七十餘卒

周耿光字篤甫龍泉廩貢湯溪學訓導事親盡孝母故  
苦塊三年廬墓三年

連洪錦龍泉人兄有罪應遣錦慮嫂孤姪幼願以身代  
後遇赦歸尤克盡弟道

陳繼韶字九成龍泉庠生事親盡孝因匪擾避鄉父被

害韶寢食俱廢哀號成疾而亡

季煒字寢昭慶元人由郡庠生例貢任南甯府照磨事  
繼母先意承志遇疾衣不解帶五十餘年孝敬如一  
郡守周茂源孫大儒嘉其孝四舉賓筵

蔡文華慶元人親嘗病癱華舐其毒延醫調治藥必先  
嘗顚天割股以愈親病

吳之英慶元監生母年九旬英竭力奉養母病祈禱請  
代及卒食必依柩側中丞馬以孝友可風旌其門

吳其瑛字月山慶元監生母年老奉侍不離左右有病  
扼腕撫膺所以身代事兄撫姪克敦敬愛

吳來聘字伊園慶元庠生母死未葬守柩侍食孺慕號  
泣行路悲傷年至耄終

姚炳慶元庠生性倜儻識大義親歿篤愛兄弟仲弟徽  
卒撫其孤讓產與之

吳應凝慶元庠生事親至孝每逢雨雪暴作必奔墓號  
泣好善樂施年至八十餘

王家較雲和人聞寇陷雲和家較父名產被擄至景甯  
逼取餉銀捶無完膚時家較他出歸知父爲賊擄大  
哭剪髮付妻挺身赴賊所代父受刑賊怒欲殺之者  
九家較不懼賊壯之與父俱釋歸子永甯邑增生

王應璫字施政雲和諸生遭耿亂負母逃避屢瀕於死  
郡守竇公旌其門

梅昌明字廷光雲和諸生事親先意承志有過嘗涕泣  
求撻與同里陳皞如倡建義塾未果子開端踵成之  
周豐字東山雲和諸生篤於兄弟有兄勿善生產賙恤  
終其身性好施數千金輒散之邑人魏文瀛有文名  
讀書其家特加禮遇人以孟嘗目之

梅春煊字爾達雲和歲貢有至性兄春瑛疾篤籲天求  
代兄奪愈白首友愛無間言

王思敬字日彊雲和人侍父宗仲新城訓導任與伯兄  
思道怡怡愛敬白首如髫年以歲貢授台州甯波訓  
導致仕歸佐邑令王樂築白水通衢年九十餘子汝  
業字紹殷恩貢生司諭馮至稱其醅正有父風

王思誠字有孚雲和諸生與弟思睿友愛未嘗析箸  
柳光岳雲和諸生性孝友能以產讓鄉黨義之

柳希聖字景言雲和諸生嗜古工書孝事寡母沒身不  
衰伯兄希賢早世教猶子振統餼於庠邑令王樂以  
優行薦旋以毀卒

林茂岳雲和人父歿撫二弟茂熙茂烈俱入黌序茂熙  
字敬純髫年食餼以友愛稱佐兄力行善舉里俗居

喪率用緇黃嘗作戒僧道論以示儆

熊鈺雲和諸生與兄鉉怡怡至老未嘗分爨

吳然孔字會道雲和歲貢親喪泣血廬墓司訓曹祖昌

卒貧不能返襯慨然資之時議舉孝廉不受

李長貴先世由閩徙雲和為石工性至孝父母歿鬻身

以葬年三十二卒

林日芳雲和人割股救母病尋愈

鄭緇字正夫宣平人少貧養親晝採薪供甘旨暮燃松

照讀入泮食廩餼遊太學及親歿哀毀失明

鄭正訓宣平人母病割股以進三院獎之

陶璠宣平人幼年割股愈母後以歲貢訓壽昌剛直之

概老而彌篤

鄭雙桂字月芝宣平人親疾割股以療後以歲貢授臨

海訓導

梁濟世宣平人年十二懼荒逋之累從父舉家避龍泉

父尋歿母老弟妹俱幼以樵薪度活復徙松之石倉

麗之白巖十餘年始還頤養寡母教弟世雄入庠嫁

妹以時訓二子入欽廩生大器庠生

王太來字家瑜宣平人性至孝父大成被賊困太來年

十三所以身代賊憐而宥之父卒結茅墓側早夕悲

號居母俞氏喪亦不異父時邑令韓扁以孝行可嘉  
潘士英宣平人弟被虎傷英持鳥銃奔救虎張牙迎噬  
銃不及發卽刺入其喉須臾虎斃

祝復禮字仁山宣平人與弟俊相姪啟乾皆貢生共爨  
五十餘年邑中義舉慨輸不吝邑文廟櫺星門向用  
木植禮與弟姪出銀貳百餘易以石邑令雷記其事  
陳鼇升宣平人母死呼搶欲絕旣葬廬於墓哀毀骨立  
墓離家十五里會大雪家人饋米愆期遂凍餓死乾  
隆三十八年建坊旌表

俞承浩字希聖宣平人習岐黃遊藝平昌旋里時伯兄

嫂已亡仲兄居鄉日又喪明浩迎之居以已屋餽錢  
米不絕及死殯葬盡禮未幾浩卒子宗煥體父志不  
取諸兄賃稅以已館穀代爲季者娶婦得延嗣續  
章自蘊宣平庠生十二歲割股療父病稱爲孝童後山  
寇猝至以刃脅母索財物蘊身翼母賊怒俱爲所害  
鄭文鳴宣平庠生孝心純篤母病割股進之

馬洵麟字徵祥景甯人雲驥子與弟斯麟皆庶出弱冠  
遊庠以國子生考授縣丞性孝友父弟皆早喪事嫡  
母生母並諸庶母咸得歡心撫養孤姪恩勤備至

劉光瑞字偉祥景甯例貢少孤事母李氏以孝聞痛父



先逝哀祭盡禮歷任邑令皆嘉獎之

嚴廷望字畏之景甯貢生績學砥行與伯兄友愛終身不忍析居甲午乙未歲大歉里有待哺者節糞殮而周恤之訓子姪生徒以嚴年八十餘好學不倦子克任克義並有令名邑令胡述文李文熊以二難稱之葉培元字斐然景甯廩貢瞻依膝下友愛弟昆歲歉人仰難者皆量給之尤尊禮師儒以吟咏適其暮年吳德輝字鳳翔景甯貢生天性純摯孫一彥字碩士廩生事母以孝篤愛弟昆課生徒成材者眾孫明倫字啟孝景甯監生性至孝比長綜理家務子姪

之耕讀者皆賴以有成

葉凌雲字錦章景甯人父業農晝耕夜讀以慰親志弱冠游庠與諸弟操修相勉勵食餼後廩膳脩脯一無私積怡然終身

梅炳元景甯人家貧自幼承歡膝下道光甲午歲大饑疫父疾晝夜侍湯藥不少間未幾父卒遵母命爲諸弟娶婦兼嫁二妹後居喪營葬以哀勞歿

李凌雲景甯廩貢精醫理父嬰足疾左右扶持八九年如一日生平樂助義舉尤喜談陰隲以示人

鮑志管字叔知景甯諸生與兄知管弟契管各極友恭

歲時伏臘於家庭怡然和樂無異幼年教諭孔憲采作三老圖說紀其事

洪克明字朝宗景甯例貢性至孝與弟震鼇紹祖紹榮友恭備至偕宗族倡建祠宇每祭雖病必親詣拜教諭茅湘訓導單春潮先後為立孝友傳

潘如漣字景周景甯增生奉親惟謹力學砥行家庭子姪非衣冠不見卓然先進遺風

褚應第字國標母徐氏早亡父繼娶王氏第夫婦曲意承順母目忽瞽第與妻陳氏舌舐之得復明母疾刲股者再甲寅兵亂負母匿深山丙寅洪水第夫妻侍

側不離水至陳氏曰汝母妻不能兩全因投溺以存

姑第負母浮中流呼救若有翼之者人共汎舟拯之

得活胞兄應舉流寓於外第密訪尋歸又撫幼弟應

參成立

舊志不書本貫附列於此

汪廷儀字維基郡庠生父病疽侍藥越月未嘗解衣假

寐昆季欲析爨取田廬磽瘠者妻歿不再娶生平博

覽羣書大學一篇尤所精究出資購衍義經書若干

卷置邑庠中日與鄉弟子講析留心濂洛真詮邑侯

徐依目為希曾子

同上

篤行

落落無能坦坦貞吉士不以奇節表異亦非以庸行  
市名也乘方不忒臨義罔惑獨行成名信今傳後若  
被馬還金彥之父盜牛畏王烈之知盛德及人聞風  
矜式尤非鄉里善人可同年語矣

宋

季棠字仲庇麗水人宣和中貢太學履行端重爲後學  
矜式官至殿中侍御史年九十餘終

王允理青田人紹興間水溢死者無數允理覓巨舟救  
溺得活者多水落沙積如山允理屋宇几席器皿如  
故事聞封奉議大夫表其坊曰進德

陳蒙青田人舉明經仕至國子學正輕財尙義家素清  
白一日有布衣持紙扇來謁上書云出韻不駐思蒙  
以酸字爲韻令賦梅花詩謁者輒應聲云影搖溪腳  
月猶冷香滿枝頭雪未乾只爲傳家太清白致令生  
子亦辛酸蒙大悅欸遺甚厚

毛當時字行道青田人由紹熙進士倅韶州積俸金散  
之親舊守雷州歸復捐田益義廩鄉人立祠祀之  
趙汝域字漢卿縉雲人由進士歷眞州判官福建節推  
知武甯縣通判興化越州汝域從官多可紀錄晚薄  
宦情奉祠歸家庭雍睦同居共財昆季畧無間言

王貫夫字仲通縉雲人由進士調儒學教授貫夫廉介  
有守鄉人薰染風俗爲變

李端履縉雲人嘉熙庚子饑告其父楚孫曰人饑且死  
能獨飽耶父曰兒其勉之會郡募發粟七邑無賑者  
履首應命復移粟他邑事聞授樂清簿建坊曰樂善  
施鵬南字萬里縉雲人弟鵬飛俱投登仕郎誥遭  
世變革不仕兄弟聚居無間言禮讓之風爲鄉邦重  
陳洵卿字仁甫縉雲人投浙東行營招撫使才識超羣  
兄洪卿幼繼永康樓氏洵卿請父令歸宗友恭甚篤  
潘好古字敏修松陽人歲饑傾廩賑之洪水至同處者

數十人古諭舟子先濟諸人舟子曰吾德公故冒險  
來好古曰濟彼猶濟我也

王灌松陽人乾道中以賦役繁重首創義役役先後視  
田多寡行之三十年而訟不抵於有司

楊大同松陽人業賈寓武林邸舍聞鄰哭甚哀詢之乃  
王尉失囚獲罪鬻女以贖故相泣別大同遂出貲以  
貸尉他日大同婚遂昌鄭克寬登進士調鄂州監酒  
時鄂守卽王尉也克寬以公事候門守覺其鄉語類  
栝問曰識楊大同乎曰妻父也守曰尙在否曰卒矣  
惟妻母見留此守曰汝爲我迎楊媪來至則坐媪於

處州府志 卷之二十一  
堂率子女羅拜因語其故置克寬於幕以薦之

程大雅字正之松陽人素尚義遇歉捐廩以惠鄉鄰積雪起視鄉鄰不火者以米置其門人有鬻妻兒者以財帛周之其人以荒山一區爲報大雅收以葬親卽今五龍搶珠地也後子孫累世顯榮

潘宗回字幾仲松陽人登進士由秘書出宰延津通判杭邵洪三郡知福州兄弟聚居三十年敦睦無間

王允卿字成之松陽人尚義好施嘗往郡索債其家夜遣妻叩門卿不納遲明卽還不復索每寒旦視鄰屋不烟者密以米置之歲饑山民煽亂私議曰我等至

縣必驚西門王朝奉奈何遂終不入子唐珪至顯官項宜中字誼甫松陽人嘗憤世變作寇蠹賦以砭其迷族有橫逆者奪其田曰在彼猶在此也嘉熙間歲祲郡守馬光祖欲行富鄭公青州故事誼甫輸粟二千石以應之旣而卜築山礪以學問爲事尤好內典人咸稱爲佛云

華延年字慶長遂昌人磊落有志操淳熙進士擢丞闕邑當路交薦之未及就而卒

元

陳鑄字叔鼎麗水人幼喪父力學通經至正間以德行

聞授金華照磨未期謝歸時二兄早喪奉嫂盡禮撫姪如子鄉人喪葬不足者出財賻之洪武初劉伯溫胡仲淵欲薦用之因哭親喪明不果

楊顯文麗水人由儒士任本縣學訓輕財樂施陞武康學教諭

劉濠字浚登青田人世居南田仕宋翰林掌書元初林融起兵興復融戰死元遣使至境上糾察餘黨鄉豪挾仇竄無辜於籍至萬餘人濠適往謁閱籍知狀歸悲憤不能就席會天大雪因與孫燾計具酒肉邀朝使宴飲至夜沉酣翼臥小樓探袖取牘錄巨魁二百

人懷歸積薪樓下縱火延燒及樓使者脫走因出懷中二百人授之朝使馳上命下止戮如濠所錄存活無慮萬人濠生庭槐究極天文地理陰陽醫卜諸書爲太學上舍庭槐生燾燾生基封誠意伯

陳德載青田人至正間避寇多歷險阻形於詩歌題曰山村雜興栽芋詩曰區理饒田早下栽綠芽纔放旋鋤開添泥善護兒孫長看取秋高撥大魁栽桂詩曰雲邊移得數株來人老花應次第開倘到子孫攀折日也須道是阿公栽後孫詔果登會元

明

陳昺字仲圖麗水人父必良蘄水知縣母寡育昺甫一紀充郡庠弟子員洪武庚子舉於鄉篤於養母無仕進意郡守張公佑周公祺皆禮爲大賓年九十四終金善字仲與麗水人洪武初由人才爲行軍椽史於軍前活人甚衆後陞乾州知州孫愷曾孫文忠信元孫祺俱顯

吳泰處州衛人干戶父早逝母王氏抱節育泰年十一襲父職尙文藝讀書好古正統間山寇竊發效職守城年未四十乞休進階一級別號懶雲

葉玉字振之麗水人八歲充增廣生後以貢官海州教

授孝事二親與弟友愛始仕福州捐俸助貧生朱德

貞等勒學宮題名碑厯宦二十四載清苦如諸生

高鑑字益之麗水人潛心力學不樂仕進鄉里有爭訟得其一言卽服人有骨肉難處之事聞鑑言頓省悟戴詮字文衡處州衛人以歲貢授鹽城訓值歲歉當道命監賑至興化得羨銀九百餘兩令請中分峻拒之悉以分賑令復以四十兩爲贖蓋懼其泄聞當道也又堅卻之淮揚賊嘯聚侍御檄入賊巢諭撫卽直入曉以禍福賊遂解散轉益都教諭擢宿遷知縣未任卒祀名宦所著有會正錄十二卷

何允恭字克讓麗水人純樸寡言笑事父母以孝厚恤孤甥家世業醫允恭益張其業每晨興袖藥餌視疾以次徧及不責其報獄中苦疫施藥療之所全活不可數計祀鄉賢子珙孫鏗別有傳

張欽字克讓麗水人性質直人有過面斥不少恕友愛諸弟與汪瑛吳榮講明經義以貢授九江訓擢湘潭諭皆以勤教清白自守土有貧乏者濟之後以子敦仁貴贈兵部主事季敦復繼登進士

金旅字崇吉麗水人十歲時母疾籲天告代母病革粒食不入口與兄祥弟祺相師友以貢授雲南永昌府

判承檄安撫干崖隴川酋長餽金與馬卻不受謝事歸杜門賦詩卒年八十著有易意白湖詩文集

葉榮字本仁麗水人府學增生績學工文卒以數奇弗售而制行過人朋友鄉鄰稱貸者不下百數輩死不償者焚券而恤其孤親戚宗族待哺者無慮十餘家貧不能娶者助婚以繼其後督學郡守皆旌獎之葉楨字瑞卿麗水人嘉靖戊子鄉薦初授江西宜黃縣以剛介忤當途改宦巴東巴民立祠祀之尋遷廣西梧州通判不赴著有石川橋韻府釋義家禮便覽

何珙字良璧處州衛人封刑部郎中溫毅閒靜事二親



至孝撫弟姪友愛姻戚缺生計者貸給之郡守董公拓學池捐地爲助家人欲乞綠波亭扯抵捐地架樓其上時珙就養京邸歸聞之曰此古蹟也安得專爲已有命毀之墟其地以還

何宗字東瑞處州衛人忠厚績學作人不倦修舉郡中文會多所造就陳藝王一卿姪鏜先後登第皆其指授以貢任撫州訓導祀名宦著有策場集要若干卷陳遂字宜民麗水人由選貢任曹州學正天性孝友兩奔親喪徒步千里嘗易己產代姪輸逋負纂孝順言行錄心體力行絕跡公門篤信好學不愧鄉先生云

柳杲字寅賓麗水人由人材任處州學訓得俸金悉濟族中之不給者後謝病歸身範家模多所垂法

王庶悅麗水人與弟庶庸同居四十餘年內外無間言有地近學宮卽輸入不肯受值

王存誠麗水人以儒士徵授上林苑典簿尋擢監丞時山寇爲亂有指良民爲盜者存誠適回里遇於黃頭塢辨其非盜力白當事活之著如愚集

吳子聽麗水人居家篤行孝弟鄉人有不平者多往質宣德間歲歉捐租爲鄉民代輸

易文字宗周麗水人衛左百戶應襲棄之就文爲府學

廩生屢旌優行父中風卒於浴盤遂終身不浴由貢仕益府教授為王世子所重贈以詩居家以壽終

程錄字文式麗水人讀書知大義事親先意承志父沒遺婢以奩具遣嫁之友愛庶弟田產悉均分之處宗

戚鄉鄰恩意周洽有司扁其門曰克敦孝友父應龍亦以耆德見推人以為世濟其美

葉世瑞字汝賢麗水人由歲貢授松江訓轉泰順諭歸州學正多所造就諸生頌德不衰以老乞歸

高岡字子升處州衛人文景子登嘉靖壬子鄉薦初授金谿令陞臨江別駕轉南康俱有政績念父老謝政

歸時弟逋官賦三百金就繫即為代償凶年出粟賑貧乏姪貧為之婚娶麗水令樊君以世德扁其廬年

九十有五祀鄉賢

王三接字汝晉處州衛人弱冠食餼麗庠父患怔忡侍湯餌先意承志以貢授廣臬照磨念母老乞歸一日

渡石牛舟中拾遺金驗係縣胥輸官租物俟久不至攜歸代納黏券櫃側不使知為已也卒年八十餘

張率孝字立愛處州衛人家貧力學有聲郡序父為讐家所誣將置死孝代父備受摧辱重趼走訴上臺寃

得白以易授徒成就者眾

陳守字子約麗水人世業儒以恩選授貴池丞廉潔不苟告歸足不履塵市郡守任公延縉雲李參知賓筵李曰必得陳子約為介始赴郡守延見之古樸真率益重其為人年九十餘卒

許成義處州衛人父病侍湯藥跬步不離以貢授開化訓轉望江諭與諸生講課不倦兩地俱有碑志

梁仲彩字邦相麗水人悃悃敦厚孝友無間延師訓弟姪必從豐腆排難解紛片言羣囂盡息

張愛字子仁麗水人性孝友擇師儒以訓宗族焚券恤乏施棺修路里閭稱之

張鶴翼字鳴臯麗水人苦志力學與兄鳳翼相砥勵家居河埠有徽商以幣物見寄適家遭回祿甯緩已物盡出所寄商聞變意不復得比至一無所失喜出望外庭植花卉酒酣有家貧花富貴酒後興狂豪之句耿鏞字良忠麗水人泗國公六世孫行篤禮恭念先祠缺祭懇當道得入祀典捐財以濟諸姪壽八十六終陳嘉鳳字天祥麗水人性敦孝友嘗隨伯父宦游閩中以思親力辭歸父以餘資遺之悉讓於兄至喪葬祭禮倡先盡禮屢旌優行教子若孫皆有聲庠序

李鶴麗水歲貢授錢塘訓轉餘姚精形家星厯家居蔭

蘭種菊性不能飲而與鄉耆會興趣迥然年八十餘  
汪應濂字希宗麗水人刻志力學孝事二親以貢投金  
華訓課士多所成就轉南昌諭移疾歸

葉綦字盛卿麗水人行已端方敦孝睦族撫育幼姪分  
產贍之以貢任建昌訓未期月卒

潘璋字良用麗水人任蕪湖巡司為王遂東先生所重  
權稅秋毫不染告歸囊橐蕭然與從弟璠督濬好溪  
堰畢盡心力

何其美字汝器處州衛人英敏力學為督學紫溪蘇公  
首拔幼失怙事繼母極孝弟恃母愛不恭以事被繫

美傾囊營救以貢未及投官卒

王應瑞麗水人砥廉隅敦節義孝親撫弟撥腴田以供  
烝嘗恤窮困創渡葺橋人多稱之

王化民字育卿麗水人早失怙事母何氏極孝嘗從學  
於致虛樊公屺瞻葛公貞父黃公皆以大器期之數  
奇不售貢後母年八十餘孝養不衰授諸暨訓卒

葉節字子高麗水人隱居篤行以孝義著稱

陳嘉陞字貞所麗水人幼失怙事母承顏怡志年十三  
游泮六舉優行邑令樊欽重之

蔡隆遠字思泉麗水人性直行敦慷慨周急任安慶知

事政績茂著致仕家居惟課子誦讀年八旬終

鄭浙字子東麗水人嘉靖三十一年舉人歷知東平耀州以岷府長史致仕杜門謝客服御無華子芬任清流訓導轉甯海教諭致仕歸淡於世味有父風云

王敦儀字應望麗水人髫年穎異小試輒爲有司所奇孝事二親父歿以遺產讓弟嘗下帷法海寺一日早歸遇人攜釵釧值數十金忽暈仆懼爲後至所攫待其甦簡付之祖墳在芝田往展謁見人盜木恐其驚墜戒從者勿呵取別道回子一中成進士歿祀鄉賢劉大烈字思武麗水人篤於孝友由貢訓合肥諭舒城

教授南康待諸生如家人父子晉周府紀善致仕子世用貢生亦孝謹有父風

張學甲字思過麗水廩生有文名潰兵掠括鄉男婦避亂於鳳山後寨甲出爲兵獲曰引我至寨當免爾死甲厲聲曰吾何惜一命而救鄉人遂竄深淵而歿

葉伯仕字行可麗水廩生學行兼優丙午鄉試途遇鄉人發麻被拐勒擔夫賠償父子俱思自溺仕出已資代還旣而沾病在省夢神人增壽一紀

王璵青田人由賓貢任定遠知縣老而好學手不釋卷處家事伯兄如父居官愛民禮士定遠立學自璵始

王皎字應光青田人少與包持友善不以貧富死生易  
心永樂庚子同領鄉薦持先任德州訓導卒於官貧  
不能歸踰年皎任德州學正爲舉樞還鄉又教持子  
瑜讀書以女妻之後瑜學成登科時論交以皎爲法  
葉子雲青田人爲三鄉老人正統間聞寇竊發沐溪等  
處皆爲巢穴朝廷命都御史陳詔提兵討之子雲詣  
軍門白日子雲能以寸舌退此賊遂單步見賊諭以  
禍福賊夜出女子四人侍寢白金一盤悉謝不受賊  
義之一夕遁散子雲籍所棄輜重并婦女四百口入  
官事聞議報以官固辭

葉素字尙文青田人由選貢任訓導孝父母友兄弟與  
陳中州同學同志每日氣節文章吾畏陳子至其闈  
然自修澹然無跡雖中州亦自謂不及也所著有四  
書節釋易經羨記宋元綱目斷隙覲集  
留稀古青田人好讀書善言語洪武初應召入對甚切  
時宜上嘉之曰全實老人留稀古賜名稀古以人生  
七十古來稀也欲官之以老辭錫宴歸

管潮字時信青田人禔躬長厚隆慶庚午饑潮輸穀一  
百二十石以賑貧乏縣令扁其門曰爲國賑民

張克武青田人肫篤純謹萬厯戊子己丑歲饑郡縣議

賑獨先輸穀於官眾多從之縣令旌爲尙義之門

王巽字德制青田人宋理學順齋先生之裔幼爲庠生教授門徒以道德相規禊躬清肅有非義相加者面折峻拒雖貴介弗徇也以應貢卒於武林遺訓子孫無信浮屠嘗手錄宋元綱目稱松園先生

王順度字鴻範青田人性孝崇禮以父松園公中道告殞遂不營仕進開義塾訓宗族生徒貧者捐貲賑之家以不振坦然自得也孫魁南宮人稱世德云

留夢鵬青田人邑庠生取與不苟孝友咸孚壽踰八十一

屢薦賓筵

李應暘青田人歲貢少穎異篤志勤學制行端方年二十六失偶遂不娶鄉人重其義

周應化青田人性慈祥遇異人授以醫訣方書尤精治痘施藥濟貧未嘗望報

蔣一麟字宗讓青田人介直端方幼失怙事母盡孝兄弟六人麟居長友于無間言嘗游太學歸絕意仕進弟一鼇字元少究心邛索怡情山水鼇子光璧髫年入泮子方馥少登賢書

厲一增字士謙青田人早游庠序嘗著教子語類治家摘要等書郡守鄭公賦潛光詩贈之

張文逸字朝俊青田廩生事孀母盡孝隣家失火延及其居縣令往救見逸抱棺慟哭烈焰隨滅詢之乃其兄棺也歎曰天佑善良不爽如此所著有雲光錄王建字仲啟青田人進士王唯元孫事父母孝平生好施予歲饑緩其租入議以稔輸勿言息人皆稱爲長者族里質成片言輸服嘗就溪澣結花萼堂賦詩陶興尤以庭訓爲諄諄

董克成青田人讀書通大義事親色養明初避地居鄉有忿爭者解之貧乏者周之從子仕顯登科

蔣光哲字士明青田人髫年游泮比鄰火獨扶母柩出他無所顧歲歉佃多負毀券不取居母喪哀毀幾至

滅性

蔣光啟字士賢青田人幼穎悟天性孝友讀書窮理數奇不售課子芳華輩並有聲黌序

蔣光奎字邵北青田人資性純謹孝友居鄉排解紛難片言折服博通羣書詩有唐人格調所著有世僻糾行世

劉應舉字心所青田人敦尙孝弟有彩服踏歌春晝永墳麓度曲午風清之句延師訓後講明經術當道重其齒德壽八十六終



夏應純字心葵青田人世居小奔萬厯己酉洪水衝塘  
堰殆盡純獨捐貲修築灌田四百畝年登八十

葉有光字守元青田人性倜儻通經術捐廩賑荒貧者  
待以舉火修橋梁葺文廟卹甌民之鬻妻女者郡守  
鄭公作世德傳美之

朱昌字希盛縉雲人博學能文萬厯戊子歲稔發穀數  
百石活數百家戊戌又稔復倍賑全活者亦倍有司  
給冠帶旌之堅辭不受長瀾楊澌二渡病涉多淪溺  
各捐數百金建立石埠行者德之與青田劉誠意友  
善賦詩卻寄多道性語壽八十一終

趙晉字子益縉雲人授翰林庶吉士伴讀周府德行純  
備造履篤實善古文著有太古集

李樞字子木縉雲人與弟棣楹皆有文行相友愛不忍  
析爨

李醕縉雲人棠長子性樸素不受父廕孝友篤至邑中  
疑事令每造訪人服其公正

周瓘縉雲人常德府訓導贈都察院右都御史守約安  
貧經術行誼一時宗之致仕歸絕跡公門所著有觀  
書類記怡菊應酬稿

樊通縉雲人年九十五郡守贈以聯云加五載真成百

歲只一身直配三才壽百三歲著默庵集

丁猷縉雲人敦孝友喜闕古文與善詩文者日相賡唱  
訓諸子以矩度率成令器視勢利紛華若浮雲然

范卿縉雲人寶慶府訓導居鄉讓已址以闕泮宮出仕  
捐學俸以賑貧士祀寶慶名宦年八十餘讀書不倦  
丁愈縉雲人性純謹早喪父事母先意承順母病籲天  
願以身代及卒泣血三年應貢授景州訓導以仲弟  
姪壯未授室季弟業儒未官不以公祿自享盡出爲  
娶室納儀費自少至老無妄言遽色端恭蓋性成云  
梅熙字景和縉雲人通經有學行嘗與其師朱公遷別

二十餘年千里聞訃爲服心喪厯麗水青田遂昌縉

雲訓導洪武十三年舉博學明經撫安永平軍民

陶標字光範縉雲人力敦古道早喪母葬祭循理中外  
以孝稱司理葉公材旌其門曰孝行撫孤姪如子分  
已產與之著有怡椿堂稿相軒文集昭遠集

范威縉雲人事父母孝諸弟幼拮据成家同爨五十餘  
年子孫守其家法惟謹屢舉鄉飲壽九十三

周瑞縉雲人性直行敦領產助伯兄完公賦嘗途拾五  
十餘金訪還原主

鄭重字廷威縉雲人封主事進封吏部文選司郎中太

常少卿倣儻無畛畦人有過必面督已則坦然事父鄉賢公孝課諸子咸成名怡情山水以耆壽終

鄭修縉雲人寬厚恬退有佃人匿稻於橋下者僕發之修令急覆曰毋令若覺我知也邑令周李欲見之不可及以鄉飲請曰茲禮也吾見之

李光縉雲人性孝友視勢利蔑如也暇則經史自娛常慮失禮於人俗有爭競者力和解之

應懷真縉雲人正統癸亥歲歉出粟一千五百石賑饑有司以聞建坊旌義終身不仕

李珊字玉泉縉雲人倣儻好義里人乞假不厭類以艱

於嗣益散其積宏治四年歲祲易產得八千金分道嘉湖告糴救賑遠近活者不可數計至老得兩子

鄭文縉雲人事親竭力承志字孤姪猶已子每旦焚香拜祖祠下嘗修學宮新聖廟尤喜引人於善

李瑁字朝聰縉雲歲貢封通政司參議贈刑部尙書父長以給諫建言謫終於閩扶櫬歸力辭當道賻金壽八十五祀鄉賢子四鍵鏃鏃並年踰九十樹四皓坊所著有罪翠臺吟稿

丁錦字舜文縉雲人好善樂施教子孫以清白義方屢薦鄉飲縣令躬式其閭

李陽泰字廷進縉雲人嘉靖戊午鄉薦授魚臺知縣廉  
明勁直以母老致仕後以子貴封禮部儀制司主事  
趙文德字秉仁縉雲人博通經史母病侍湯藥無少懈  
事兄撫姪各極其情邑東南馬鞍嶺衝險行者病之  
捐資平治成坦途滌嶺界仙居盜賊出沒相地勢築  
砦門爲防禦地方以安萬厯戊子歲饑減直應糴全  
活者眾以親老隱居不仕

樊秀字汝賢縉雲人事親以孝文章爲海內共推官光  
溪建橋救荒祀名宦

鄭思齊字廷賢縉雲人儻負大志淹貫子史事父母  
生事葬祭無踰禮處弟兄愛敬肫肫結社永甯天壽  
諸刹皆齊執牛耳十赴浙闈志益堅以明經選任廣  
平威學訓秩彝叙別采章有月川先生遺意歲饑道  
府委賑足遍窮村全活無算聞母訃歸廬墓三年不  
復出所著有四書精蘊周易理解靜芬吟稿

丁繼雷字廷震縉雲人以學行著聞任袁州經歷老練  
勤勞賑飢捐俸施粥全活者數千人居家淡泊自守  
惟吟詩課子談經而已所著有纘槐集

丁天佑縉雲人性靜行純立家塾訓子孫歲饑捐粟以  
賑縣屢旌獎七舉鄉飲壽九十終

李鏐字廷開縉雲人性孝友以廩例入太學授鴻臚序班貌古性誠以昆季鍵鋌鏐比稱四皓

樊守字仲卿縉雲人以明經授山東高密諭封江西道監察御史耿介博雅所著有樊山後集祀鄉賢

李翊字朝宗縉雲人事親孺慕終身與兄析業遜腴取瘠伯兄玠進士無嗣以子繼之復讓遺業以振仲兄之乏見遺金於路守其人至還之有窮民逋糧被繫捐金貸輸歲饑破困興工使得值以贍里中質成片言剖之皆意釋人擬之如太邱云祀鄉賢

李繼韶字仲虞縉雲人少篤學尤精三禮萬曆壬午亞

元署無爲州學正陞浦城令以母艱歸天性孝友持躬敦樸尤善教子父子以禮魁浙闈祀鄉賢

李彥時字子中縉雲諸生早歲喪母父歿廬墓啼號見者動容授徒婺州歸時路遇有經營失利相持拚命者以束脯十金濟之高祖恭愍公家集被燬伯父玠早世遺稿散佚多方購輯重刻以永其傳所著有五經質疑讀史臆見名山業等書祀鄉賢

丁如皋字廷欽縉雲人孝友端嚴家貧力學所得廩餼悉供甘旨餘資兄弟嫁娶登鄉書每上公車策蹇省費宰德興捐俸修學課士衡文卹貧生助婚葬置學

田備倉廩禁圖賴謝苞苴救荒掩骼善政纒纒陞淮  
安通判以興利除害爲務淮民謠曰片紙不到堂一  
錢不入囊生平操履始終無間所著有禮記家說訓  
子錄祀鄉賢

丁慈字宗仁縉雲人恬淡寡營恢拓有度得良知宗旨  
以例授楚府典儀所著有五經粹語爲善集豎巖集  
丁如夔字廷奏縉雲人行誼學問卓邁時賢人謂其嗇  
於年而豐於德

鄭士宏字孟仁縉雲人性孝友父督撫宣大邁重病宏  
方痺疾支離聞信奔走躬侍湯藥父卒哀毀骨立生  
平重禮祀闢道路賑窮乏睦族姻課四子極嚴旣抱  
子猶夏楚焉叔季同登賢書中年築小有別業自命  
爲清懶主人初授光祿署正以父延綏大捷功世襲  
錦衣堅臥不起所著有宗鏡語錄清懶窩吟稿

李洵字體習縉雲庠生封監察御史幼失怙事母應氏  
至孝外祖家替分粟贍養之歿時營葬如禮母年八  
十有六洵踰五十朝夕溫清母歎曰願汝子孫世世  
如汝之事我叔父貧無嗣生養葬祭如事外祖長子  
燦然登第迎養宦邸母不及見欷歔流涕雖蔬果必  
薦迨子歸沐侍養命分餘祿以惠三黨九族建祖菴

葺諸先塋建夏瑚山塔卒祀郡邑鄉賢

吳承恩字朝錫縉雲人性至孝父鼎博雅隱居得恩晚年七十痺且眊恩與室人周氏壹意服勞及居喪不御葷酒葬祭以禮居東郊結草堂書樂志論閒居賦於壁詩才韶秀工書畫寫梅尤絕邑令以望閭旌其門著有東郊草堂雜錄醉素堂吟稿

鄭子諤字邦直縉雲庠生父嘗患癰醫欲以刀剖之諤弗忍以口吮之而愈篤愛幼弟讓羸取瘡吮性理及左史諸書手錄三過以授子孫有古君子風

胡甯字廷泰縉雲人喜讀經自爲講解訓子孫及鄉里

鬻產以賑貧乏產且盡猶孜孜不倦築館鳩族子弟肄業其子來聘蜚聲鬻序孫長庚弱冠領鄉薦

陶旦字信民縉雲人少時以事繫都察院獄有永康池姓者亦被繫遇宥池與妻俱亡一女及笄旦攜歸擇嫁永邑人金良旦卒良偕女來弔比旦於柳下惠云謝福丁嵩義子縉雲人嵩授田州經歷死於兵子璫沒入土官爲奴時福與妻先歸在途聞變遇督運姚鏌自田來問故知璫所在欲往尋之姚喻以險阻福曰義父不可無祀遂鬻妻爲途費達田州求璫日夜泣於其門半載土官之父哀其義命還璫攜歸以全嵩

慶州府志 卷之二十一  
祀

陶舉字汝偕縉雲人任福甯州訓導巡按施山恤刑李  
瑜皆舉姻戚有指揮營署把總逆子黃脫死獄者各  
遺金數百請託叱之不受台郡二女被寇剽至閩舉  
爲資給送還之

呂管字雲谷縉雲人由庠生贈南京銅陵令端方樸直  
性至孝痛母早逝著慕萱草辭極哀萬曆庚寅疫發  
狀似鬼祟鄉人苦甚屬管作文禳之病者霍然後又  
有童子神憑之能知吉凶管召見叱禁不得爲妖是  
夕童子夢神泣告曰吾犯呂公怒將去汝自是鬼遂

絕所著又有崇孝集

田學周字以禮縉雲人由太學生授鴻臚序班正直謙  
樸雖衾影無越禮子正春官司李戒以尙德緩刑正  
春以俸入爲壽必詰所以捐其半置田助宗祠祭祀  
需曰俾吾祖宗族人世世拜朝廷賜鄉人有以緩急  
告無弗予尤喜解紛排難年七十有奇

李大夏字允和縉雲人由增生入太學父任遼東參軍  
時遼事方殷大夏聞警萬里奔省比至父奉差旋京  
病甚大夏躬視藥石衣不解帶及卒無力移櫬撫按  
憐其孝破格給勘合還服闋應選以母老不仕竭誠



奉養母年九十二終平生嗜山水好讀書所著有容  
膝齋集

李永明字覺初縉雲人銀臺鍵之子幼補弟子員改太  
學官鴻臚不私干謁念親老歸養以孝聞事庶母異  
母孀娣恩禮周悉與人交初終弗渝善詩工書所著  
有北游草信芳園集竹下吁喁仙都誌

李我懷字克順縉雲庠生入太學選崑山縣丞相國顧  
秉謙以歛怨召災懷爲調處曲當紳民共服遷京衛  
經歷又遷楚都司經歷不赴平生謙厚和順事繼母  
以孝稱

呂有音字太希縉雲人郡庠生母早喪著陟屺歌百二  
十章又集古孝行一書喜賑貧有膳親不足者周之  
父苦水道病醫云須以藥氣導入方愈否則不治有  
音泣下親以口試如醫言父病旋愈教其子皆騰聲  
庠序

麻國良字叔賢縉雲人事親婉容承志友愛其弟分財  
產讓擇美者持已端慎喜勸善釋爭里黨稱之

李遇培字因我縉雲人少時父病俗有迎婦充喜之說  
培不允父故哀慟盡禮兄禮部初臬公以文足起衰  
毅可振懦目之命二子屬門下中年患脚不窺園者

十稔著春秋約旨易註增刪各十二卷生平不事神佛曰吾奉孔氏教足矣

陳有道字子安縉雲諸生性孝友溫厚博愛善施遇有公事持論侃侃義形於色晚年構青玉堂肆志詩歌而尤長箋翰所著有養生真訣戒殺文青玉堂吟稿鄭思彥字孟美縉雲人任辰州參軍歲饑煮粥賑濟全活甚眾居鄉重義與弟仕廉輩白首怡怡

陳民信字成之縉雲人由明經任德清訓陞光澤諭署縣廉惠有政聲捐資建學士立碑記之再轉銅仁府授以途遙不赴晚耽書史絕迹公庭登賓筵者九

陶邦用名銑以字行縉雲人明易學公直不阿重義輕財鄉人貧者賑之有從弟被冤破家爲之伸雪

李繼澤字濟宇縉雲人家素封澤好任俠盡散其積應試武林與潘姓同舟潘主僕染疫僕死同舟人皆棄去澤獨爲調藥餌潘得愈出金七百分半謝之不受商以澤無子欲攜女爲擇育子復拒之月餘澤妻陶氏忽有娠

吳亨松陽人性倜儻尙節義洪武初出資財築處州左渠城五十丈十四年縣西橫源山民倡亂亨率鄉人逐捕閭里咸賴以安繼又出私帑造船於本縣金梁

烏石二渡以濟行者

劉原熊松陽人居澄川正統間陶得義倡亂男女避亂於橫山寨寨近澄川眾素聞熊名各捐簪珥求禦護熊卻之曰賊因財而致亂予復因亂而受財相去幾何卽集鄉人執殳前戰賊懼退次日復至熊戰於野斬賊魁四級而亡鄉人哀之祀於社

詹源松陽人字朝宗任湖廣楚府教授啟王以二帝三王之道王然其言及掌簿正司出入卻分例王益賢之謂世子曰詹先生學行近古剛方正直汝宜師之三年辭歸構屋一區與子姓業儒者居焉

包麟字天祥松陽人以貢授羅源訓有賊劫庫宰夜出逃麟收其餘封識之致仕歸忽一日沐浴辭親族而終

葉德佐字廷輔松陽人少孤事母至孝好施予恤緩急不責其報課子以忠孝廉節爲本子元芳令崇義有聲

徐萬松字茂松松陽人幼失怙事母以孝由明經訓櫺李俗好侈靡力矯之士風丕變轉授南安辭歸著有吳中劍南嶺北諸草

葉以章字振凡松陽人萬曆癸巳選貢任東平州同陞

衛府審理正告歸倡義建學賑饑瘞齡年至八十六  
著有詩文行世祀四賢祠

詹應霆字體震松陽人布衣能文爲府掾時有無辜受  
冤者府尹欲置極刑爲白免之時尙乏嗣夢神告曰  
汝能活人陰德不少錫爾允且錫爾程後任廣東雷  
鄉親見子孫食餼以壽終

詹立敬松陽人爲松溪尉見西門外水漂骸骨積野買  
義塚埋之復鑿井以濟孤老上臺謂其能惠起民疴  
委督大石橋仍捐俸鳩工松溪民勒石建祠至今祀  
焉

葉紹芳號小竹松陽人習爲吏勤勞任事非義則不苟  
取與民排難不可枚舉投廣東惠安尉縣城圯城中  
屢遭水難悉力修築士民受其惠至靖盜除奸莫不  
周悉解冠歸居鄉里和藹睦隣壽至八旬

劉明經號紹亭松陽人穎異過人治春秋入郡庠每試  
輒冠羣英縣建學宮與葉以章共董其事尙義清高  
築舍於竹溪以自娛

葉傳字南岳松陽庠生倜儻豪舉伯氏伸緣事忤令令  
具申傳適游學於省自負年力改伸爲傳代禡及其  
兄尹儀眞絕不望報解推惠人無德色受者罕識其

面子選功志義不羣教子若孫有父風

鄭邦棟字隆之遂昌人性孝友少熟內經濟人疾病一介不取與兄邦相承先志修葺定溪渡石馬嶺洞峰嶺楠岱嶺茶亭增置膳夫以壽卒

周子輝字彥華遂昌人弟子忠被誣當死連坐妻子輝謂妻曰吾弟死而無嗣奈何妻曰以吾次子孟曉代之輝曰是吾意也遂以曉往曉年十四慨然從命竟刑於市撫弟子孟曦孟顯成立以已產均分之鄉人稱爲古之伯道云

朱子堯字仲穆遂昌人讀書好古以義訓俗弟子理有孝行正統間宣平寇入境慕其德義以劍書門曰積善之家戒不得犯其行誼感化如此

華鎰字時重遂昌人精醫術由歲貢任辰州學訓陞湖廣鄖西教諭以母老不赴

朱自疆字體乾遂昌人博學好古事親孝母故以試在武林不得訣奔回慟哭幾絕季叔早世竭力殯葬撫其子弟逋負獲罪罄產解之以貢授莆田訓導謝病歸著易經破愚四卷

項森字子秀遂昌人祖泗父孔賢皆以積善稱森精岐黃術施藥濟人萬厯初歲饑鬻田煮粥以活人嘗買

山一所堪輿家曰是宜塚盍自營之森以葬父母後  
二子以經學顯

葉以然字懋春遂昌人母病徧請名醫因盡得其術遂  
以醫致充裕周貧乏修理橋梁道路生平用藥多不  
責報且賑不能具藥者鄉人咸敬信之

蘇廷榮遂昌人家世業醫至榮益精歲大疫遍行診治  
貧不能具藥者施之龍泉陳令得疾請療道拾囊金  
七十兩坐候失者不至遂前行十里許有赴水幾危  
者拯起飲以藥少甦詰之乃徽州木商汪榮卽失金  
人也問其故曰金旣失矣奚以生爲驗其數皆合遂

全昇之壽八十終

周李遂昌人篤於孝友尙義好施有佃者郭得祥逋租  
百餘石納女充婢以償卻不受更予衣米遣嫁之負  
錢者貧不能還卽焚其券

華化民字子與遂昌人學諭孫懋昭廣闢泮池界其地  
欣然予之得異人授治心氣方修合普施理刑袁公  
遇春舉賓筵鹽院胡公繼升給冠帶年八十三

葉以萃字仲秀遂昌人好善樂義建育英樓以田七十  
畝爲膳置渡船龍口獨山焦灘三處各捐租給舟人  
邑北東梅橋二十都獨口橋圯壞咸以石易之以子

廬州府志 卷之二十一  
三  
焯贈京衛經歷

包志道字惟一遂昌人髫年有聲庠序中歲嬰疾嘗築雲嶺根石橋大柘西嶺茶亭甫及貢而卒

鄭文誥字天章遂昌人幼讀素問靈樞忻然有得遂精醫術不責報晚授太醫院吏目嘗置定溪義渡洞峯嶺茶亭往來德之

包燿字子昭遂昌人少游郡庠嘗從龍溪先生私淑良知之學發明朱陸同異之旨生平好施歲疫艱得藥物往衢賈賑遇寡人鬻妻償債將別號勸出囊金贈之晚錄周程張朱要語刻行於世知縣湯顯祖爲之

序

華存理字伸察遂昌人正統七年歲凶出粟賑濟旌爲義民子孫繁衍多列冠裳享年八十七

包秉鑑字孔明遂昌人有隱德博雅善詩時馬步巡司久缺縣令借以管攝鄙夷不屑正統壬戌歲大饑奉詔出粟賑饑遣行人賜勅旌之勅云國家施仁養民爲首爾包秉鑑能出稻穀一千一百二十石用助賑濟有司以聞朕用嘉之今特賜勅獎諭勞以羊酒旌爲義民仍免本戶雜派差役三年尙允蹈忠厚表勵鄉俗用副朝廷褒嘉之意欽哉故勅正統七年四月

朱景和字其順遂昌人自強之子萬曆辛巳以六人考  
貢當首選念正貢老而貧遂讓之壬午中鄉舉署滋  
陽學諭丁內艱復除荏平談經程藝多士敬信擢感  
恩令雅尚德化徙舊城禁採鑛創九龍書院皆有利  
於士民者以勞卒於官祀名宦著求我齋類稿學師  
窩迂談等書

徐棣字子登遂昌人寬厚簡默以拔貢授福甯訓復除  
閩縣轉諭永福值縣令缺檄署篆清白自持著有虛  
谷彙編

葉恩字天錫遂昌人以吏員官吳江主簿調蒙化衛知  
事不赴處鄉里有構詞者得一言卽解人有過面折  
不少容然坦白無他故無憾之者

周紳字文佩遂昌人少業儒旣長從事邑掾奉公守法  
授惠安尉時劉君宏道爲宰諸所規爲相與謀議民  
並頌之居家遇荒歲出貲貸人不能償者焚其券

包志學字而時遂昌增生歲荒出穀賑饑時痘疫流行  
買參藥濟貧者賴以生族女孤子無依者撫而嫁之  
鄭一桂遂昌人質直有古風家族聚一鄉食指滿萬雍  
雍如也以子九炯貴贈承德郎江甯知縣



王可諒字友卿遂昌庠生生平重然諾尙義輕財嘗葬族人之暴露者宗黨稱之年八十六而終有詩集

黃緝遂昌人孝友純良以例任廣西南甯衛經歷居鄉三旌善良五推宴筵壽八十七終

鄭廷康遂昌人禔躬古樸有長者風安貧樂善以子貴封給事中

潘覺民字任卿遂昌人事父母甚孝早歲失偶終身不再娶待兄弟友愛家貧舌耕弟子以百十數稱爲人

師經師云

鄭秉貢字文元遂昌人年十五父被仇害徒跣訴當道

縣令池浴德鑒其誠斃三人杖下孝聲動一時  
徐榮字仁卿遂昌人孝友純雅外母家貧無歸奉養終身以貢任江陰訓課士有軌度陞南豐論

朱九綸字廷重遂昌人以文章受知於丁哲初湯若士由歲貢訓臨海慷慨慕義有貧士王生以逋賦爲縣卒辱逮而杖之遂出俸代輸遷諭柳城時義烏沈尉夫婦闕殯搜橐數拾金畀其子以櫬歸教授紹興捐貲刻功過錄甲申國變率鄉人爲舊君服夙善古文詞工八法著懶雲集子家瓚拔貢屢中副榜有文名包可成字汝材遂昌人天性孝友篤志實修授徒鄉里

訓子及孫並餼於庠生平仗義釋紛每周旋人患難所全活甚眾以壽考終

朱九職字廷任遂昌人性孝友輕財好施崇儒重道捐貲義塾造就黨俊造舟龍鼻頭濟渡置田二十畝凡有修建不惜重費遇歉賑饑施藥救病樂善不倦

朱國泰字子保遂昌人性孝友六歲失怙卽嗚嗚孺慕逋償輒焚券免之中丞高公嘉其孝義給冠帶獎勵以壽終

王國懋字士勉遂昌人授晉江圍頭巡檢爲郡守孫公朝讓所器委以獄務饑疫並至懋獨割俸施藥分饘

賑饑闔圍賴以生全因病乞歸

鄭一寰字調元遂昌人體貌魁梧學識該洽爲人排難解紛族里推爲祭酒晚課三子並有聲庠序

華知良字恒宇遂昌人幼篤孝友長而睦族好施賑乏崇貞間舉鄉賓逸居山谷有隱君子風年六十五卒包經武字君揚遂昌人秉性純厚好義樂施事後母以色養更以舉業成昆弟壘篋攸協且周人之急崇貞丙子歲歉北鄉尤甚全活百餘人及助茶侵雲嶺至今膾炙人口有盜其家者不較途拾遺金候失者而歸焉其子生員長明禔躬有父風

包英滄號後川遂昌人性樸行端以孝友著聞鄉閭多  
爭鬪勸之息訟更好賑施待以舉火者數十家子尙  
雲孫家駿繼登黌序代有古風

陳天錫字公純遂昌人歲貢性友愛好周人急常贈金  
完貧人之室父母皆八十餘喪葬盡誠撫幼姪教養  
婚娶如己子詩淡遠有致

鄭邦相字珍之遂昌人仗義解紛有王彥方之目仕河  
南府照磨轉山西大同府照磨奉檄散兵糧及查各  
堡軍器清慎多賢聲致仕歸事繼母撫孤姪以孝友  
稱

徐朝偉字士雅遂昌人嗜書史薄聲利由歲貢訓新昌  
轉諭江右新昌賦歸杜門課讀邑令許旌爲德門人  
瑞

周士廉字介夫遂昌人食餼郡庠與同學友徐懋厚俱  
爲邑令湯若士所器厚病瘵不起屬廉以嗣事廉慨  
諾爲立孤以女字焉厚妻王氏從容就節復爲申請  
建坊以歲薦訓湖庠諭湯溪補任漳平教諭年七十  
五卒

王文雅字時正遂昌人以歲貢授常山訓飲人以和不  
計束脯以德行道義相勗後赴京改選諸生爲立石

頌教澤

時可諫字君可遂昌人弱冠餼郡庠邑令湯海若重之  
由歲貢訓進賢諭安福授紹興投老歸休足不入公  
庭年七十二終

吳自明字元貞龍泉人孝父母友兄弟待里黨有恩排  
難解紛人得其片言卽服耽習文藝值寇亂憤鬱卒  
楊宏字崇仁龍泉人任南京光祿寺珍羞署署正引疾  
歸才學行義爲鄉閭推重

張銓字秉衡龍泉人涉獵書史篤於行義知縣鍾繼瑜  
扁以海內耆英

張八公龍泉人饒於財樂善好施號張八佛每歲賣穀

錢六十一把歲歉鄉價增八十其子亦增之八公坐

於門看糴者出問之價曰畧增些公悉以錢還之

梅茂清字時夫龍泉人以貢任太倉諭爲大學士王荆

石所敬重致政家居絕跡公門以壽終

陳應時字登鼇龍泉人性慷慨好義任武進丞轉廣德  
州判任滿回籍山寇竊發闔邑不甯時捐產募兵禦  
之後爲寇所獲夫婦俱遇害

吳潭字源潔慶元人簡重雅博領北京鄉薦授常德節  
推通判吉安府咸有治績少在諸生中遇遷學出廩

助之嘗有齎金輸稅因醉道遺既覺欲赴水潭力止之且給曰拾金者我也引歸鬻器物以償失金者得不死他行多類此評者謂其今人古心云

吳文慶元人狷介有守為上海丞以節儉稱致政歸族有不給者助之壽七十而終

葉春字子仁慶元人幼從叔學叔故撫育堂弟由貢丞新興山民積逋以情感之即刻輸納令吳川海寇肆掠以理論之即時解散陞高州府判以母老致仕

吳禋慶元人純篤寡言和而且介佐宿州二載即謝政歸養以孝聞宗族有貧者周之為鄉評所重

吳節慶元人純謹雅素授新建丞月餘致政人服其高吳贊慶元人端方孝友宰連城貞介自矢居官甫一考即歸結廬龍山下二十年無私謁

吳伯齡慶元人有聲庠序母族夜失火有墜金髻者齡拾之詰朝持還其人以半稱謝竟不取通判汀州歸行已修潔為一邑表望

吳則宣平人以巡檢平賊功天順八年陞華亭主簿明察善斷巡撫滕公雅善之遣署上海令清負租萬八千石賑饑民八千餘戶值海溢為災復陳情蠲租六千餘石士民德之作借賢為民詩

見松江府志子仕偉為顯官

俞奉璋宣平人事親孝尚義周貧崇文修學至今頌之

梁應期宣平人歲凶捐穀四千石煮粥存活無算子一

鴻承父志建高浦橋於新嶺創寺施茶以濟行人

湯濬景甯人由歲貢任高明學諭德性温厚卒祀名宦

陳懋儉字舜嘉幼失怙母沒廬墓三年由貢歷常州教

授有貧生三喪不舉捐金助之致仕歸為兄營葬州

間稱孝友云

舊志不書本貫附列於此

國朝

汪起練字震先麗水人與兄起紳事孀母以孝聞康熙

初閩逆陷處州起練避兵陳蔡山中同知趙瑾亦在

焉或以其為賊所指目恐速禍欲縛獻之起練曰趙

公義不降賊端人也曷若護而去之遂間道送往他

山明年趙隨親藩統兵至召起練兄弟欲官之固辭

不受趙後官真定奉金為壽復不受乃旌其母苦節

以報之

王任祖字覺斯麗水人仗義有為鄉民李官壽以貧鬻

其妻任祖責以大義傾囊贈之平居正直自守遺命

不作佛事

何廷友麗水諸生乾隆十九年歲饑為粥以食餓者次

年復款廷友力不給貸諸鄰以賑之知縣陳諱表其

王棟字殿臣麗水人少孤善事其母既長忼爽能濟人  
急松陽令朱肇端以公誤去官挈眷屬依棟閱五載  
厚資送之鄰龔甲餽棟舍以居死不能具喪棟猝無  
以資輒曰鬻爾舍可矣圃人以貧病鬻婦行有日矣  
棟聞之爲償其聘錢晚歲遺世事讀書自適嘗語人  
曰吾共學諸君率致身通顯今皆下世吾獨以不材  
獲全幸矣因自號半癡叟年八十二而卒  
戴希良字鑑溪麗水人乾隆中以歲貢授長興訓導諸  
生謁見諄諄以禮義爲勗春秋享祀先期齋沐具品

儀必如法課士之暇攜琴訪佳山水嘯咏自得以老  
乞歸長興縣志稱其清白廉介不涉勢利蓋實錄云  
徐學詩麗水歲貢以經史教授里中垂四十年秉性端  
慤雀鼠之爭咸爲平之乾隆中縣令張士楹榜其里  
曰無訟村

朱濱字關溪麗水人不求聞達時戚屬之急者而資之  
財歲凶則與無業者田而薄其征有代兄書券質錢  
者旋沒司藏者以爲言濱曰故非若負也奚責爲遂  
焚其券母嬰痼疾蓐處累年濱與其婦周左右之不  
假婢媪里中推篤行

王正燦字懋昭麗水人嘉慶初以諸生舉孝廉方正少端謹力學弟早世無子妻以身殉正燦以已子後之而撫其二女比長厚嫁之歲饑知府涂以輶發常平倉粟糶之不足欲運於溫而難其人正燦力任之佐以私財泛舟相繼他日置義倉復輸穀千斛爲倡修好溪堰濬東北二水道皆不辭勞費焉

翁開宗字維本麗水人嘗爲外祖置祭田以慰其母里有鬻妻者予以資俾完聚疾革命子取故舊借券還之嘉慶中知縣表其門

王尙忠字藎臣麗水人五歲而孤少長爲諸生精潔自好恆佐治州縣幕以養其母遇事明敏主者倚爲重家居畱於自奉而赴人急難雖燎毛髮所不辭嘗曰吾非好爲矯情以幼時曾貸百錢不得沒齒不忘也里中社倉耗於游食尙忠經營鉤考復以充裕所著曰芝庭詩稿曰哀餘問答枯蒼金石志則與嘉興李遇孫里人王尙賡共成之者也

譚學鎔字範金麗水人少穎敏工詩爲諸生遊學於杭歸益勵學購書數萬卷假觀不吝篤於故舊緩急可恃有貸重金以遊者閱數年擁厚資歸置前負不言學鎔遇之如初人多其雅量焉



陳棠字景南麗水監生家素封好義急公廣文屠菹渚  
著麗水志稿攜歸嘉興棠出百金購回鋟其板道光  
二十六年修志多資采擇他美舉亦俱類是子鳳鏘  
以所建倉聖廟及擇山義學助爲圭山書院其尙義  
頗有父風云

張茂成字貞卿青田庠生順治間直指牟公檄郡縣檢  
報善士鄉里同聲推舉牟公檄獎曰和惠成性留太  
古之高風長厚爲心去晚近之澆習又賜匾曰崇古  
範今子曰宋孫國璠皆諸生

厲而宏青田人質敏嗜學少遊庠父立身期以大器事

父備盡孝養明崇貞間造巽山塔宏之力居多順治  
丁亥倡率早完急餉邑令杜公獎曰巽宮佳士  
徐曾青田人庠生孤苦力學所交皆知名士慷慨任俠  
貧交恃爲緩急

洪明彥青田增生少見器於先達杜心池妻以女屢獎  
優行邑令王君稱其孝

金士成青田人性醅謹乾隆十六年歲饑土成鬻產赴  
甌運米數百石散給鄰里存活甚多十八年地有虎  
患又延弩弓手獲二虎民賴以安邑令張教諭徐均  
給匾獎之

厲長灝字紹遠青田諸生康熙中耿寇旣平田荒不治  
長灝白於令請召募墾闢出私資以助族兄邦英遭  
難棄家而遁爲贖田百畝召而還之所居階前有巨  
石挺立因自號一石云

徐紹偉青田恩貢少好學博覽羣書叩以歷代人物事  
蹟上下古今滔滔不竭貧者乞貸量力周之凡橋路  
亭廟有圯廢者皆倡議修葺嘉慶丙辰邑令梁雲會  
學博朱秉元以孝廉方正薦不受年七十餘卒

周瓚字贊玉青田諸生家雄於貲與當世士大夫遊故  
爲時望所歸初受知於趙令展揚屢以文爲贄趙倒

屣迎之嘉慶間歲饑出貲糴穀以賑貧者子三士芬  
士蓮貢生士芳諸生

項以溶字履元青田人以明經教授喜獎借後進性介  
不可干以私家貧後稍裕嘗誡子弟曰吾微時就傳  
歸見突煙起喜午餐一飽今日得此幸矣子二懋馨  
分水教諭懋齡廩生

周濬哲字希濂青田人郡增生性孝友言行相顧博學  
能文晚精岐黃業絕不計利率卒年八十五子二一楨  
增生之楨歲貢署樂清訓導

陳璧字東園青田歲貢讀書至老手不釋卷性方拙寡

言笑終日危坐見者無少長必拱立以待有館下生  
與友有隙友讎璧歸過館下進饌置毒謀斃璧歸獄  
焉俄毒發諸生聞故璧託言有錮疾潛取溲飲之大  
吐而愈諸生微知其情而璧終身不言年七十卒子  
敬時增生

陳鍊字國昌青田諸生里有佃其田者未刈而納租是  
夜疾風甚雨禾盡漂沒鍊聞而返其穀有穿窬者與  
家奴通胙篋而去未遠也家人知其人欲追之鍊曰  
迫於貧耳遂勿追同治三年卒

夏霖字錫如青田庠生正直樂善非遇公事足未嘗履

縣庭黃令世俊以一鄉善士表之子廷瑚道光乙酉  
拔貢授直隸州州判署山東歷城知縣孫樹棠試用  
訓導

朱學蕃字志中青田歲貢好讀書不預外事課徒甚嚴  
嘗有句云百事早知無可管六經常愧未能窮卒年  
六十三子煌郡廩生

丁明翰字渙羽縉雲庠生克敦孝友力周窘乏縣令注  
以士林山斗旌之壽七十三五子俱庠生

丁春富字亦榮縉雲人力耕供職常得父母懽及歿居  
喪盡禮生平禮法自繩親友有過必力勸止死之日

有舊鄰百里奔赴奠哭甚哀子七伯舟叔梅並庠生  
叔舟登拔萃科

丁昌宿字景星縉雲監生性聰敏工詩畫家不甚裕而  
好施有地在學宮前慨助之縣令汪宗魯旌其義  
施繩周字惟姬縉雲庠生仗義好施待其舉火者數百  
家請貸無不應歲乙未大饑周發粟以賑活者千人  
楊大元縉雲人丙子歲饑邑民擾攘縣令董定國勸其  
賑濟元應命捐粟全活多人以善義足風旌之  
虞健字若乾縉雲例貢好讀書暇則鼓琴自娛一日操  
別鶴調未闕適族人告貸首肯者再族人怒以為慢

抵其琴於地蹂以足碎焉健仍貸之粟仿北齊顏之  
推作家訓二十一條

柯文烈字繼松縉雲武生饒有財與弟文熊遇歉歲減  
價平糶賑窮蠲租有客死無力葬者傾囊飲助之文  
熊字喬松監生

林端恭字時恩縉雲監生性慷慨好交遊居黃龍莊地  
當孔道延納過客惟恐不及遇文士極意款洽瀕行  
必有所贈無不滿其欲而去子三長映丹三彬相繼  
補弟子員次伯朋能醫皆有父風

呂起恂縉雲人有佃者陳某以貧故鬻妻恂勸止之周

以粟又有張某者亦以恂故夫婦獲相保鄰人子王  
增壽幼孤患痘已不起恂購葠醫之不索其直增壽  
竟蘇歲貢生曹啟秀家貧不能自存恂時時貸其乏  
絕及卒曹慟曰余無依矣教諭程文淦爲之傳

趙仲光字德彰縉雲人事繼母以孝聞邑有東梁堰灌  
田二千餘畝而堰高勢窄水易涸仲光鳩匠鑿開之  
受堰水之田遂無旱患

樊聖階字紹聰縉雲人由武舉歷任江西饒州南昌廣  
信守備在廣信時饑民滋擾有司將發兵聖階止之  
身往曉諭卽協同賑濟民賴以安解組歸捐建大興

橋東渡橋親赴甌江勸捐遇病卒於旅邸

黃璟耀字坤元縉雲庠生有窶人某負數十金將鬻妻  
以償璟耀聞卽召某還其券某叩謝而去好吟詠有

琢山詩稿

李含球縉雲庠生早失怙事繼母甚謹性慷慨值冬月  
有不相識客至恤其寒解衣贈之無德色

李霧飛字天福縉雲人父以廢臥牀侍藥石數年無倦  
父卒廬墓事母益謹母有所好每微諷之霧飛解其  
意雖難致之物務期必得戚里有告貸者如數應之  
無吝色卽貧不能償置弗責并焚其券

胡鳳騰字景升縉雲人性孝友喜施濟鄰有先富後貧  
鬻柩以餬口者鳳騰與值受置別所某卒舁還之又  
有議鬻妻以償債者傾囊助之事遂寢年六十五居  
母喪猶哀泣廢飲食

丁國輔字廷佐縉雲選貢生幼失恃事繼母以孝聞友  
愛兄弟侍父病衣不解帶者一年於友誼尤篤會邑  
建石橋借樊聖階往永嘉階卒於寓躬親含殮爲扶  
輿歸學博王誥著仙都百詠廷佐出貲梓之乾隆甲  
寅卒於京邸

田肇庭字煥若縉雲人和謹修飭口不言財品望爲鄉

黨所尊敬刑家有法長幼恂恂如也丙戌以選貢就  
州判後改教諭嘉慶戊午本省鄉試欽賜副榜官  
分水教諭在任三年絲毫無所取知縣洪昭憐其清  
苦屬諸生共爲八十壽堅辭之旋乞休卒於家  
朱懷袞字惟補縉雲人以選貢歷任肇慶通判性質實  
工制藝遊曹厚庵門得窺著述之奧分俸以周貧乏  
著有時習錄平齋集

田樂堯字賡勲縉雲人賦性溫良坦懷率物嫡弟早世  
撫孤姪幼女若子歲薦廷試西山劉先生於試卷中  
想見其爲人令二子執經焉

施之大字三立縉雲人博通經史陶淑及門以躬行實

踐之學年八十以明經終弟之顯亦為鄉評所重

田逢年字景熙縉雲人友愛兄弟積俸置產分贍其姪

由歲薦授湖州府訓導

李以醇字元璞縉雲人由歲貢除昌化訓導勤課生徒

人文振起巡道及縣咸旌獎焉年八十有一

施延功字肇宜縉雲人立品端方操履不苟以歲貢授

浦江訓導課士維勤年七十六致仕

朱芳蕃字展成縉雲歲貢勤學好問性情真摯敦孝友

崇信義年至八十有三卒

陳祖麟字祥遠縉雲貢生幼失怙恃事兄嫂盡禮里中

有爭訟者必委曲勸導之教授生徒以品行為先儒

學孟濤稱為學校完人

陳朝榮字克和縉雲人貧而好學至老不倦教授生徒

從者日眾以信義自持善與人交數十年如一日以

明經終

呂承禧字緘夫縉雲諸生有文名天性沉厚功名勢利

淡如也每嚴冬侍親臥榻以手溫足達旦不倦兄弟

白首怡怡年二十六喪偶不再娶喜讀儒先語錄謂

學當以窮理盡性為務又善書畫至晚年行益修謹

吳廷綸字克諧縉雲歲貢性純篤父兄御之嚴能曲盡孝友生平砥節勵行刻苦嗜學尤善誘後進邑西學者多賴造就焉

丁時芬字望月縉雲人訓子孫以耕讀足不履公庭歲饑出粟賑族里嶺口坑修治險道慷慨倡捐壽至九旬五世同堂

楊翰字漢種縉雲歲貢明季民逃租稅村舍爲墟翰出貲招墾全活甚眾厚幣延師以訓其子有李某主其家中翰以女妻其子宗陽後以選拔爲江夏縣丞翰子楷中武科喬拔貢章食餼邑令旌其門

朱瑛字翰臣號培英縉雲人富於財常訓子弟曰予積金將以積善若能繼志吾願畢矣道光五年其後人捐建郡城試院正廳十八年又助建本邑之文廟共費銀一萬有奇不負祖訓云

樓步雲字友仁縉雲廩生家貧不妄取喜造就後進嘗以不畏窮三字激勵學者建右文館課督諸生購田作一鄉賓興至今人稱頌之

蔡廷元字國解縉雲人郡庠生慕義急公歲祲餼族人粟鄰村火延燒五十餘家量力拯恤之是年本村又火六十餘家拯恤如初



呂載揚字周鷹縉雲人嘉慶十六年早出金赴旁縣買粟貴糶賤糶貧民賴以存活二十五年旱又出米二百石煮粥食餓者壺溪當台婆之衝舊有石橋久圯每水漲行者往往覆溺揚承母命與弟載希造大橋糜白金三萬兩又命子建始建盛建縣治前東渡兩橋貴與壺溪等學使朱文定公錫之名爲作三橋合記勒諸石

朱開垣字克承縉雲人郡庠生恆於歲除出粟以濟貧乏嘗往仙居收債還其券且益以穀嘉慶辛未大祲爲粥以食饑者庚辰歲饑亦如之上侍祖父下撫曾

元壽至九十子邦璵庠生亦至九十二有司聞於

朝均賜七葉衍祥額

朱輝號梅巖縉雲歲貢性孝友父畏雷每聞必趨侍左右居母喪一夕鬚髯爲白教人先德行而後文藝從遊多知名士交道尤篤與邑麻作絲善麻亡後家落遇其後不異存時有言其葬地不善者爲出金卜吉遷窆著有懋雲齋集藏於家

朱蕙字承猷縉雲例貢家故裕伯仲同爨四十餘年一錢尺帛不入私室贍恤鄰里不自矜伐卒之日被其澤者咸爲流涕長子璣登拔萃科

王謨號秀竹縉雲人以諸生就例貢性明敏喜吟咏著有指南文集好善急公道光丁酉議重建學宮值病篤促其子朝綱尅日鳩工乃瞑目而逝閱三載告成費幾二萬金學使羅文俊爲文記之

樓鳳昌字維騰縉雲庠生幼失怙事母惟謹昆季友于怡怡如也戚族中有紛難事片言折服之年至耄耄猶手不釋卷  
陶宗彝字成器縉雲人郡廩生家貧力學妻子以無米告不恤也教人以宋儒爲宗尤篤友愛恆以修脯爲諸弟償宿逋歲祲以妻嫁時衣易粟與昆季共之

李樹樾字綱堂縉雲歲貢性剛直有膽識時邑有鄉民藉端生事樾聞之隻身星往諭以大義眾悟散去人有誤賈多金請償夙負卽遣送還居家以孝聞  
呂毓溪字春波縉雲人廩貢生補授安徽歙縣丞歷著政聲道光十五年縉邑旱災出銀三千九百餘兩買米以濟窮黎丁憂旋里終於家

呂榮祺字翼謨縉雲拔貢報捐兵馬司副指揮道光十二年本邑大旱捐錢四千三百千買米以賑事聞歸本班儘先補用十六年任中城副指揮十七年以功陞河南光山縣知縣士民爲立冰清德政碑卒於官

黃聖軒字君載縉雲庠生性孝友事繼母陳氏逾於所  
生父年踰八旬軒亦老每侍父側不命之退不敢退  
邑有公事毅然倡舉會計出入分文不入私橐

張見利字若曾縉雲廩生家貧潛心於學顏所居室曰  
潛齋廉介有守孤芳絕俗焉卒之日教諭程子質以  
正士風流挽之

盧兆萬縉雲人性樸實不欺辛酉粵寇至有紹容避其  
家曾藏百金於樓倉聞寇遽走數月客返倉已修繕  
客顧而失色兆萬曰有失乎遂取原物還之時里人  
方開玉屏嶺路客助錢二十千以誌其德

麻書詔號墨樵縉雲廩貢沉靜簡默事繼祖母惟謹會  
遭匪亂出貲募勇捍禦鄉閭兵燹後斗米千錢道殣  
相枕藉詔與職員趙琳請縣尹白觀察赴甌運米煎  
粥以濟民賴以安

楊輝芹縉雲人字藻堂性簡放不拘繩尺膽識過人會  
粵匪寇郡城官軍駐紮縉地首先輸粟及陷縉雲出  
鉅貲募敢死士督戰累挫賊鋒後破麗水之沈村黃  
畝却金館梅田連拔十四賊卡斬獲賊首奪騾馬器  
械無算移屯巖泉與秦鎮軍克復郡城復約三鄉團  
勇攻縣城追殺西鄉餘黨境內肅清

盧樹敏原名龍縉雲人恂福無華沉潛嗜學與人不款  
曲而質朴有古風掌教金蓮書院以貢授訓導未任  
而卒著有磨鐵山房詩稿

潘延洙字聖源松陽庠生讀書不問世事丙戌夏妻毛  
氏產厄會潰兵數萬至男婦盡匿洙夜負妻至河村  
尋卒兵至獲洙命引至男婦避處不從引刀自殺避  
難者藉以獲全

葉瑛松陽人善醫設藥肆於門以待疾者而施之子濬  
承父志歲稔罄庾粟三百石以賑郡守廉其事旌之  
程文安松陽人任瓊州府經歷勤慎守法待上官不干

以私教子萬里有聲贊序

葉承芳松陽人以知印授瓜埠巡檢通商便民清廉盡  
職餘俸解還公帑道府嘉獎焉

劉應機字安山松陽人由歲貢官廣東澄萬縣知縣地  
有珠池採珠者向有常分歸官應機概却不受任滿  
歸行李蕭然郡守黃公扁其堂曰琴鶴遺風

陳湛字燕侯松陽人爲諸生聲噪膠序由歲貢選鄞縣  
訓導自守廉介餽遺一無所受致仕日徒步而歸

葉文蔚字豹巖松陽人敦誠古樸富而好施嘗獨力建  
明倫堂他義舉亦輸貲無吝色工書爲時所重人爭

處州府志 卷之二十一  
三  
構之

葉燦字含華松陽人由歲貢任昌化訓導每以讀書端品教率士子

丁瑗字聖友松陽人敦行誼重然諾爲人排難解紛干以私者正容斥之乾隆丙辰歲貢選湯溪訓導年七十五甫至任而卒

周光賢字耀德松陽人讀書敦品崇尚儉約教授生徒多所造就由歲貢任天台訓導倡議復興義學年八十致仕歸

戴日康字國泰本籍金華遷居松陽順治四年洪舜寇

松縣令脫匿洞陽觀遊擊陳發兵捕兇洪舜退屯白巖日夜劫掠陳疑有爲寇暗作間諜者民情洶洶日康謀曰此事非縣令不濟然勢急矣但使印信尙在可爲也乃潛入縣署於三堂匾額上搜得之遂出安民告示又密遣人迎邑令從後衙入出見遊擊力剖無間諜事松民賴以安堵

詹儒熊字渭兆松陽庠生康熙乙丑歲饑儒熊以米二百石煮粥賑之鄰有產女欲溺者儒熊命婢抱歸撫爲已女有借貸弗償者輒焚其券年至七十卒

劉廷英字殿侯松陽貢生康熙五十二年舊市江進源

以負債鬻妻哭別甚哀廷英偶過其門詢知之代償聘金以理遣娶者六十年均後徐正利亦因貧鬻妻已就道廷英追回贈金復全其夫婦

詹廷韶字又善松陽庠生生平多義舉有程某者貧鬻其妻韶贈金使復完其夫婦雍正甲辰春有丐者十餘人以疫死於舊學基傍神廟中韶悉備棺埋之

劉時信字希賢松陽人束修自愛富而好施捐造橋梁修砌路道掩埋遺骼義聲藉藉郡守黃邑令連皆給匾獎之乾隆五年舉鄉飲壽至九十一

葉龍光字繼先松陽庠生敦品行好施與名重鄉里少失怙恃卒能振興先業晚年以栽花種竹為事二子仰舜仰禹克成父志

孟廷瑋字蒼佩松陽貢生候選縣丞讀書善屬文精草隸遇事練達嘗建文昌閣造育嬰堂并重修文廟及松邑志乘鄰人因貧鬻妻瑋以金遺之夫婦復完姪貧而孤代為婚娶歲周其衣食

葉增初松陽人性恂謹人不敢干以非義歲入餘則濟親鄰之貧乏者或勸置產初曰積金不如積德何以產為

周斯盛字載錫松陽增生刻志讀書屢試高等有幹濟

才雅意急公學宮圯壞斯盛倡議捐修品重膠庠

蕭元侯字漢留松陽人幼失怙母撫之成立重然諾好義舉雍正己酉歲饑煮粥賑民全活甚多黃公渡屢溺人造船以渡子三長懋禧廩生次貢生懋學懋爵均有文名壽八十五卒

蕭懋學字敏來松陽貢生好讀書與當世名士質辨疑難學業日進且振貧濟乏義舉高著

饒士芹字忍齋松陽人慈祥公正平日排難解紛每多隱德子慶霖登賢書主講書院數十年科甲廩附半出其門

蔡懋昭字東璧松陽附貢生天性孝友親病刲臂以進撫幼弟三人各成名嘗興築城南河隄慨捐二千餘金竣其工為百年之利云

潘學元字善長松陽人性純孝居鄉行善不欲人知咸豐戊午隨張邑侯募勇防禦髮賊在介首陣亡年六十有七

鄭衡字廷侯松陽庠生好讀書不干外事鄉里有爭競者輒排解之舊市宋某無力婚娶衡以金助之五男咸入黌序年六十卒

項宗旭字旦華遂昌人博學能詩事庶母撫孤姪誠篤

可風晚益潛修著書自樂多行善事年七十而卒  
徐一貫字宗一遂昌人篤志詩書力行孝弟析家產悉  
以腴者讓諸昆歲饑捐穀以賑活者甚眾邑令趙以  
清標碩德旌之卒年八十有四

俞日高遂昌人性慷慨多所賑恤嘗間道請兵禦寇叛  
逆威不能屈巡憲劉公及柳令俱旌獎之

朱霞字丹若遂昌人讀書善詩所著有安遇草少尙義  
俠有商於龍游者失水貲盡不能歸將自溺霞傾囊  
與之後數年獨行山中悞陷深穴不得出忽有人呼  
儔挽之卽前失水者甲寅陷於賊不受僞劄歲餘以

### 計脫歸

朱宗瀛字翼堂遂昌增貢性慷慨好周人急嘗捐金造  
渡航建路亭復於里中勸義塾建文昌閣於上不吝  
重資

濮應乾字以貞遂昌人早失怙事母以孝聞康熙甲寅  
遭寇率鄉人力禦民賴以安甲申歲稔運廣米以濟  
急不問其償癸巳復饑賑亦如之年六十一卒

朱挺字彩虹遂昌例貢生性樂善不靳財力雍正癸丑  
續修郡志共襄厥事郡伯炳菴曹公顏其堂曰聖世  
蜚英



王曰謨字大文遂昌庠生折節讀書工詩文家豐於財喜施與出鉅資以石板鋪街道并捐田爲童試卷資王敏教字二舉遂昌人以歲貢授訓導篤志好學爲後進典型耿亂檄授雲和教授守志不屈年七十有三華國昌字卓君遂昌庠生慷慨好義順治初劉遊擊率兵勦寇駐華祠役夫四百餘需供給不及將四掠昌一人餉之乃止

鄭家醕遂昌附貢生家豐於財而性好施濟辛未歲大饑設粥廠以食餓者疾病則施以藥全活無算人咸德之

鄭元調遂昌庠生孝友朴誠施予無吝色雖家不饒裕而周急扶危赴之惟恐不及年逾八十  
俞長輝字含芳遂昌貢生孝親濟眾雖竭家資不倦自制府至郡牧疊加優獎學憲李公以才品兼優選舉約正年五旬而卒

葉培蘭字百東遂昌歲貢自幼勤學子史經書靡不淹貫教授生徒修脯不計康熙間彭逆擾亂猝至村中眾皆倉皇奔走蘭問故答以寇至詫曰焉有此事我當諭之以理爾等讀書毋廢業也羣匪至聞百東先生在此相戒勿犯而去

吳炳文字鴻章遂昌增貢生髫齡失怙事孀母撫二弟  
孝友兼至性豪邁見義必爲絕無畏避與兩弟捐貲  
數千金倡建宗祠於練溪下流倡造石梁築長堤以  
衛一鄉往衢郡大道橋路盡已朽壞獨力營築竟三  
十里而遙

官正相字長壽遂昌人天性孝友以睦嫻任卹爲己任  
乾隆四十五年歲旱煮粥濟饑有恃刀筆者以未饜  
慾壑輒興雀角四十九年又值歲祲因改濟爲借弗  
責償蓋以避施名也五子皆列庠序曾孫承誥由拔  
貢任粵西州判

包玉章字德佩遂昌人例授縣主簿早歲失怙稍長習  
經紀慷慨好施尤篤孝友爲父兄立祭產復置田爲  
子姪婚娶資於杭城倡建公所鄉試士子得棲止焉  
壽八十有一

葉萬里字聲遠遂昌武生性孝友乾隆十年冬堂弟雲  
爲虎嚙仆地倉猝間徒手奔救遂斃虎見者咋舌蓋  
其天性勃發有以激而成之云

葉起泮字飛鬢遂昌人乾隆辛酉拔貢與弟同爨四十  
餘年學品兼優一方奉爲楷模

吳國顯遂昌庠生事繼父母不異所生家無恆產而周

邱勿倦門下皆成端士鰥居四十餘年以壽終

徐台睿字明遠遂昌人秉性謙和篤於孝友嗜書史薄聲利生平無疾言遽色排難解紛人咸敬服由歲貢授訓導

葉燧字之鑑遂昌武生幼失怙恃克自樹立樂善好施有已離夫婦出資成全之親朋無不受其周濟年逾七十終

劉瑩字琇皆遂昌附貢執親喪哀毀骨立篤志經書品學兼優滇南彭明府贈以詩

鄭國賢字序賓遂昌增生襟懷磊落制行端嚴爲人排

難解紛卽竭己財弗恤人亦得其一言無不立解

吳林遂昌人由恩貢選臨海教諭未赴卒少孤貧事母至孝撫姪如子同里有尹周兩姓貧將鬻妻傾館穀以全其夫婦教人以端行爲重嘗曰吾輩一日間必有一二善言善行有濟於世方不虛過年逾八旬所著有求心堂集子二長秉純府庠生次心恬由優貢

任黃巖教諭

戴炳璉字介然遂昌人事親至孝性正直國初彭寇旣殲設保甲法綦嚴極力調護遠近諸村賴以保全七子俱列膠庠

李樹萱字北堂遂昌歲貢少失怙事母以孝生平不解會計肄業省城敷文書院有年歸授徒不問修脯遇寒士濟恤之求無弗與晚年家落處之泰然選授義烏訓導未赴任卒

周廷鏘字瑞昌遂昌人幼失怙鏘與妻范氏竭誠奉母居家勤儉不事浮華敦行樂善情極周摯生八子教以義方曾元十餘人雍雍如也

戴祥遂昌庠生幼穎異年十八冠童子軍受知於竇東臯先生遂龍交界處地名西灘爲浦城要道舊無渡每溪漲多溺於水祥捐置義渡以濟行人

官清字時舉遂昌人性孝友質直好施與告貸者接踵於門郡城試院將圯命子寅齎資往造東西文場計費萬餘金又建義塾於蓮城山麓郡人立位祀之年逾八旬卒子寅亦樂善好施杜石樵宗師以爲善必昌額之

徐文光字仁良遂昌人邑有橋名北固圯於水光獨任其事越三載橋成費金萬有七千餘府縣上其事議叙直隸州州同

黃夢圖字河升遂昌監生家僅中人產而好義能濟人困每臘月待其錢米者幾百家

黃維城字宗輔遂昌例貢生濟困扶危出自天性遇歲荒卽減價平糶雖賠累弗恤也素精岐黃鍼灸能起膏肓貧人有病不惜重資解囊施治弗取其值

鄭士楨字蓋臣遂昌歲貢幼遭寇亂荒逋疊積邑令奉檄嚴徵懼父被辱以身往應令呵斥之答以儒童試以文走筆立就令奇之詢得其以身代父狀益嘉嘆而寬恤焉少年食餼試輒冠軍邑令繆延修邑乘子國光亦能以孝行世其家

李仕道字見可遂昌人篤行力學有得卽書戶牖間皆心性格言廷試授縣令改選餘姚教諭陞衢州府學

教授廉隅峻潔守令甚重之尋陞山西翼城縣丞署縣三月致仕歸

王起緒字統傳遂昌人自少篤學以恩貢任上虞縣教諭教士育才捐俸修學宮崇聖宮明倫堂且創建義學置田延師年七十餘致仕歸

毛儀點字聖與遂昌人幼失怙恃事兄如父鄉黨有不率教者諭以道義莫不感化嘗與兄以千金建石梁人皆德之由恩貢任浦江教諭與諸生講學疊疊不倦致仕歸壽至八十有二

官承宣遂昌附貢生天性至孝事母承顏怡志裊躬矩

步繩趨三子均蜚聲黌序

包國勳字拱宸遂昌人由附貢例授廣東鹽大使署潮州府饒平縣東界場大使秩滿辭歸助書院田租上憲以急公好義額之

王新道字咸若遂昌增生篤志好學事親能得歡心鄰里有構爭事必爲之解釋子翺庠生邑令傅以士林矜式旌焉

童應華字美中遂昌歲貢生家貧舌耕非公事不履公庭閉戶潛修年至八旬卒

華浦字時沛遂昌增生好學不倦尤喜獎勵後進行誼

爲鄉黨所欽子昌基亦增生善書工詩著有新甫吟一卷

王儒已字汝爲遂昌庠生仗義急公尤精於岐黃之術拯苦救貧未嘗取值

華文津字心庵遂昌人由恩貢任永嘉教諭行優學粹造就有方

王文光字用賓遂昌人家小康恤孤救貧負者弗與較家遂落年逾六十而終

王琪遂昌恩貢生性孝友持躬嚴恪教授里中游其門者多知名士父歿撫諸弟成立子恩溥道光丁酉拔

貢卒年七十四

朱達字用行遂昌廩貢生品端學邃孝友性成就養子燦榆福建龍巖州署旋里年餘壽考而終

吳秉純字健甫遂昌人郡庠生行篤孝友仲弟以優貢北上傾家產資之教訓子孫惟以詩書爲貽謀著有臥雲吟草一卷

葉世銘字鼎傳遂昌庠生淹貫經史好善急公道光壬午修邑文廟及文昌宮妙高書院費千餘金邑令爲之請獎辭勿受遇戚友不能婚娶者均解囊贈之長子永英中辛亥亞魁

陳仰南字永厚龍泉人夜拾遺金於三思橋坐待至曉乃發婦持以完賦者還之而不受其謝

劉景蕃字尙恆龍泉庠生親歿居喪哀毀家不甚饒而勤於施予造棺榔衣衾以濟貧乏者二十餘年

柯國榮龍泉人性謹厚好善有橋名利濟久圯康熙五十六年捐資獨造以便行旅妻張氏於雍正十年歲歉煮粥以濟饑民道遠者復捐園粟散給之

葉有贊字聖實龍泉諸生端謹自好晚年以義方訓子孫凡修橋賑荒諸務皆捐金爲之倡康熙乙未雍正辛亥邑大饑減價以糶困穀舉孝廉方正不起署縣

令王良穀贈額曰道義遺風

傅之駿字逸羣龍泉庠生敦厚友于有佃人張姓者積欠租三百餘石將鬻妻以償駿召詢得實立返其券又姻黨婚葬有不舉者親爲經紀好施予恤緩急未嘗望報

林浩字其天龍泉貢生兄超早世訓諸姪成立賑族人之貧乏歲饑慨蠲佃者之租邑中義舉皆首先捐資歷任知縣疊獎之年八十六終鄉人以酬恩報德扁其祠

季汝明字旭光龍泉人孝友醇謹生五歲而孤母葉氏

親授論孟句讀弱冠遊庠癸酉選拔廷試優等例留太學肄業因母年高乞歸輕財樂施里中有陳姓者貧不能娶妻將他適矣明出資財衣米以濟之又沈某家貧鬻妻號慟不忍別明捐財以資生計妻得不鬻子爲謙庠生亦有父風保正某侵虧社穀百餘石械繫縣獄將鬻妻女以償謙罄困代輸得免事奉祖母以孝聞

傅可儀字景文龍泉庠生有族弟貧不能給將鬻其子儀曰弟不可無後爲出金贖之又佃者妻寡子幼寔乏無依儀遞年賙恤之壽八十餘邑令蘇遇龍給匾



獎焉

柯常秀字穎實龍泉監生性慷慨地方義舉輒身先之  
歉歲煮粥以濟貧乏存活無算乾隆甲申除夕里中  
祀神不戒於火延燬鄰居男婦窮蹙無栖常秀周以  
錢米酒脯一時咸受其惠司訓沈光厚贈以詩後其  
子啟光弱冠遊庠亦有父風

劉篤材字敦培龍泉歲貢性孝友凡建家廟修宗譜力  
無旁委里中有大橋冲圯材首先倡捐建復人歌利  
涉年七十餘授定海訓導坦易待士歸數年以壽終  
湯霽字光璘龍泉增生幼失怙事母張氏以孝聞昆季

友愛無失容敏學綜博尤勇於爲義前學博沈光厚  
有老成典型之目壽終七十有一

蔡聖茹字仲連龍泉庠生好讀書尤喜孟子及左氏春  
秋嗣因兄早逝遂任家務嘗以留槎書院爲少時肄  
業之所歲久漸圯乃建金鰲書院并置田租以資膏  
火

李濬號鶴堂龍泉諸生議叙通判好善樂施嘉慶乙丑  
以萬四千金建濟川橋錢塘梁同書爲文誌之

蔡志青字雲軒龍泉人端方正直道光間歲大歉施粥  
活人他善舉無不樂爲於永嘉西關輦石甃路百餘

丈知縣黃錫祚額其廬曰任邱可風子士彬士魁士榮士釗亦有父風

王致中字慎齋龍泉拔貢博學篤行樂成善舉嘗與歲貢生蔡士豪等倡捐賓興

蔡士豪字玉溪龍泉歲貢生選武康學訓導冲齡失恃事繼母終身無忤色平生好義急公倡建金鼇書院并置田以增膏火邑士赴試者艱於資斧因與王致中集資二千五百串取息爲鄉會路費士林德之巡撫楊獎其好義可嘉

李存耕號璣田龍泉庠生工詩畫凡遇公舉皆輸資無

吝色歲饑出莊穀千餘石給鄉民而以家內餘資賑貧族人皆德之

蔡士庭字聲揚龍泉監生孳孳好善嘗捐賓興義舉道光間歲大旱出穀以賑貧民咸豐戊午死於難子盛虞媳王氏皆殉之巡撫王壯愨公旌其廬曰忠孝節義

周允中號心臺龍泉人由廩生捐教職歷署新昌定海訓導捐廉課士以師範稱家居益好學樂善凡有義舉無不助成之

周允元字春毓龍泉廩貢生好讀書工詩古文詞生平

尤多善舉

蔡士魁字蓉峯龍泉人恩貢生好善仗義造倉聖殿建  
字塚族黨有紛爭者善排解之歷署諸暨教諭仙居  
訓導卒年六十七

季忠允字心鏡龍泉歲貢生少穎異長通經史工繪事  
兼精醫理貧苦者邀之立至不計酬且施以藥著有  
瘡利寒熱虛實辨臨危援筆賦詩而逝年五十有六  
潘德馨字畹香龍泉諸生成豐八年粵匪踞雲和之七  
赤馨出賞團勇扼安仁嚴山嶺頭連獲勝仗賊不得  
過因繞北竄城徑至馨住處殺馨馨適未歸焚其廬

馨仍帶勇隨周軍門克復城池辛酉夏賊再陷雲和  
又辦團防守保全桑梓以功保訓導署餘姚縣教諭  
壽至六十有六

李忠昭字廷輝龍泉廩貢試用訓導州同銜性耿介篤  
學工詩邑之濟川橋本其祖獨力重建咸豐間復庇  
材鳩工修之戊午辛酉聞寇警地方保甲章程皆其  
悉心籌畫知縣陸之棟以孝廉方正薦之

余法字敷源慶元歲貢品詣端方事繼母以孝聞人有  
不及以情恕之子鎮修理邑文廟以見義忘勞稱次  
子鎔亦膺歲選

慶州府志 卷之二十一  
姚居厚字粹然慶元歲貢氣節傲兀終日危坐無惰容  
喜頌周易至老不倦

季學康慶元人郡庠生居家孝友好善樂施翺建角文  
橋修整邑文廟皆首出重資年七十檢各佃欠券悉  
燬之

吳逢昌字起明慶元人由恩貢授廣東歸善知縣常俸  
外不漁一錢頌聲載道歸家日橐垂如洗

王廷聘字尹再慶元增生學通經史性格端嚴事親睦  
族爲儒林領袖

姚太岳慶元人郡廩生秉性端直有古風教授生徒至  
耄不倦子必選中年雄於資能以色養孫洙涵並貢  
生

田登慶元庠生性循謹不事紛華鄰里貧乏者無不周  
恤且尊師重道義方訓子子聯聞明經

姚又輝慶元庠生友愛弟姪人無間言佐修邑文廟城  
隍廟兩涉寒暑勤力忘勞教諭丁葵以定力長才旌  
之

葉世美慶元人性純樸友愛出繼伯嗣所承嗣產不肯  
私諸己年二十九歲妻歿誓不再娶嘉慶二年子光  
岳白於院憲以持義可風表之

姚鵬慶元庠生孝友篤實疾將危屬子孫曰子另儲白金千兩里有義舉汝曹見卽勇爲其子孫克紹箕裘沈旺璣慶元人兄弟共爨家七十餘口耕讀各安其業延師課子均有成立

吳恆晶字崑山慶元增生幼失怙事母以孝聞兄喪明服勞盡職性尤好善捐田以佐賓興平糶以濟荒歲凡善舉無不慷慨樂爲

吳其睿字有臨慶元庠生性毅直工文詞凡諸善舉踴躍贊助知縣陳以秉正堪嘉額之

余槐字德三慶元人讀書工文藝屢受知於督學諸公

爲明經領袖鄒令捐建書院卽出金爲諸生倡歲饑煮粥賑濟活者甚衆子湛漳同爲知名士

姚鸞字和聲慶元增生尙義疎財邑令吳沆卒於任貧不能歸鸞以金贖之郡建試院獨力輸捐有司詳其事議叙州判孫冠字魯儒附貢生亦好善有祖風

吳世哲字兆明慶元人少失怙事母以孝耿賊陷城合邑逃竄哲據案讀書戶外賊聞之相戒勿入族賴以安賊平後邑令梁允桓首舉賓筵

葉作遴慶元人雍正三年北門火災遴亦被患族鄰有遭難者先給米穀并出白金按戶分散後遷居東門

邑令鄒儒贈以忠厚傳家額

劉春華慶元人家貧好善至老不倦倡修裊橋及角門橋至今來往人咸感之

季上機慶元庠生好施予乾隆乙酉夏里族被火機戶給粟一斛所濟甚眾明年松溪李源村又火濟給災戶亦如之

吳慶十字鼎之慶元人性仁慈樂行善舉當耿逆擾城屍積盈巷鼎之出其資築大塚於城南盡取暴露埋之

王汝楫字濟川雲和歲貢任嚴州建德訓導諸生謁見

諄諄以孝弟爲勗在職有年士皆慕化子懋功字熙績有雋才以拔貢充教習卒於都門

周成璋字廷選雲和歲貢嘗捐已貲與諸生卽逢泰請復義學不果因捐膳田爲賓興費

鄭沛功字敏堂雲和諸生孝事孀母遇人尤謙謹司諭方宏模稱其寬厚和平有醅儒風子紹裘亦諸生

顧宗陽字春巖雲和歲貢早喪二親事繼母以孝尤篤於友誼麗水明經葉攀鱗將赴都謁選宗陽力爲稱貸以潤行囊不給更質已產充之

江學源雲和武生孝友純謹樂善不倦壽至百四歲曾

元林立 賜昇平人瑞坊

梁尙璧宣平庠生樂善好施有種芋苧五十餘家負債千計欲典妻鬻子以償璧聚券燬之所買僕婢服役二十年後給以居舍器皿使女稍長擇婿嫁之并贈以奩年八十一爲郡大賓

章毓賢字汝哲宣平庠生閩變後人散田荒本鄉逋賦例行照丁攤賠畏糧累者生子皆不舉賢變家貲代爲完納康熙四十四年歲饑市無粒米賢舉家食粥省所餘以濟窮餓

潘士仁字邦友宣平貢生雅尙儒術建屏山書屋日涉

書史以敦崇節義爲己任學校名宦祠久廢士仁出已貲建復邑令雷爲之記

王萬齡字申錫宣平人乾隆己酉選貢嘉慶辛酉 賜舉人壬戌會試 賜國子監學正嗜學愛士至老不倦立品端嚴後學多所師承年至八十餘卒子朝柏監生治昇廩生治安厯署富陽奉化台府訓導皆能無替庭訓云

俞林模宣平人少讀書遇事不肯苟簡樊嶺爲宣邑出省要道徑仄崎嶇模易以石板如履平地施捨棺木數十年子大賚大賓大賡亦好善有父風

廣州府志 卷之二十一  
潘士耀字邦煥宣平人少孤孝養寡母妻弟鄭貧不自  
立爲其子娶媳並存卹之鄭得繼似續長子德懷歲  
貢生精岐黃乞刀圭者無虛日

俞君泰字國仁宣平監生慷慨樂善造萬安石橋計費  
一千二百餘金邑令欲爲詳旌却之每遇歉歲周濟  
貧乏癸巳甲午大疫死無棺槨者悉施之計數百餘  
口經營規畫一心獨運爲匠人所莫及邑令馬英遂  
黃維同相繼詳報錫冠帶

潘子儒字廷瑞宣平貢生慷慨樂善修上坦嶺石門嶺  
曳嶺用錢一千八百餘緡並捐田以資賓興

鄭國旦字宗道宣平貢生性孝友兄早故事父母並臻  
上壽好施與遇義舉捐金不吝鄉里貧人死不能具  
棺者施之至數百餘歲饑出穀以賑貧乏初艱嗣續  
暮年連舉三子

陳彝字曰叙景甯庠生行直品端慷慨尙義橋梁舟楫  
有頽壞者輒捐資修葺之歲歉則發儲分貸族鄰多  
賴全活

潘龍翔字際霄景甯廩生讀書能體道義奉親色養與  
兄弟處從無疾言怒色調卹親鄰常恐不逮云

陳元典字範吾景甯庠生樂善好施里有窘於晨炊者



親攜鹽米濟之或貧不能婚娶必傾囊以助

吳希申字正臣景甯諸生乾隆十六年大饑傾廩以給鄉鄰歲暮積雪彌月按戶餽之穀得免於殍弟希剛亦好善人稱二難

吳作基字正業景甯庠生性敦孝友家僅中貲而好拯卹嘗施粥以活饑民年五十連舉二子

陳時尙景甯人好善樂施嘗至閩之壽甯遇有將鬻妻償逋負者卽解囊予之夫婦完聚如初  
李鑑堂字志光景甯附貢生幼孤事母盡孝道睦親族周匱乏不吝重貲以助善舉

任廷佐字輔之景甯廩貢生急公好義重實行而戒浮華孝事再繼之母處異母弟友愛無間

王嘉銓字光煥景甯人少孤深潛好學事母與兄懋清克諧以孝生平隱德弗耀遇困乏卽力周之逋者雖數百金不復問

處州府志卷之二十一終

